



明史

選舉志敘

夫馭天下之大法取人與用人二者而已矣明初欲以網羅天下之士屢有變更迨典章一定迭為遵守行之既久雖詐偽萌生弊以踵至然自立法以來一代之人材政治於是乎出而其後之補偏救敝規條寢多卒亦無能少有加益乃知致治以人不以法法不能經久而無弊亦不能因其弊而人即以變法是

在規時善守之而已今以有明選舉條分縷次大約有四一曰科目以鄉會試統於文而武係之一曰學

校凡貢入太學及生徒之隸太學者詳其考校登用之制而次及於郡縣學一曰薦舉諸以辟召及為大職之宜而所考課者附紀焉凡以之四者釐然其載其本末而二百七十餘年其為人材盛衰政治得失之故稍稍可觀矣

明史卷七十一

選舉一科目上

明取士之法科目為最重三歲以提學所取士試之各直省曰鄉試中式者為舉人次年禮部奏請以各舉人試於京師曰會試中式者天子親策之曰廷試亦曰殿試試畢為進士自兩試行而士之通籍者至進士而極矣然鄉試為士子策名之始司其事者尤加慎重故歷久遠而條例以詳備焉明初太祖猶循元制令有司歲舉賢才及武勇謀略曉天文兼通書律之士得賢者賞濫舉及蔽賢者罰吳元年令曰上

世帝王勦業之際用武以安天下守成之時講武以
威天下至於經綸撫治則在文臣二者不可偏用是
以周官選舉之制曰六德六行六藝文武兼用賢能
並舉此治化所以隆盛也茲欲上稽古制設文武二
科以廣求天下之賢其應文舉者察之言行以觀其
德考之經術以觀其業試之書算以觀其能策之經
史時事以觀其政事應武舉者先之以謀畧次之以
武藝俱求實效不尚虛文然此二者必三年有成有
司預為勸諭以時勉學俟開舉之歲克貢京師洪武
元年詔天下郡縣學專治一經以禮樂射御書數分
教務求實材三年詔曰漢唐及今科舉取士各有定
制然但貴詞章而不求德藝之實前元依古設科待
士而權家勢要結納奔競輒竊仕祿賢者耻與並進
風俗之弊一至於此朕自今年八月為始特設科舉
以取懷才抱德之士務在經明行修博通古今名實
相稱其中選者將親策於廷第其高下而任之以官
使中外文臣皆由科舉而進取有奔競夤緣者坐以
重罪於時京師行省各舉鄉試其額直隸百人河南
山東山西陝西北平福建浙江湖廣各四十人廣西
廣東各二十人才多或不及者不拘額數八月初九

日第一場試經義二道四書義一道又三日二場試
論一道詔誥表箋内科一道又三日第三場試策一
道中式者越十日復以騎射書算律五事歷試之遣
使頒詔於高麗安南占城諸國其士子各就本國鄉
試貢赴京師四年令行省連試三年以備任使已應
試者衆召尚書開濟等諭曰今秀才徵至數千人宜
嚴試授職濟等條議乞選廷臣之有才識者公暇延
訪以經明行修為一科工習文詞為一科通曉四書
為一科人品俊秀為一科言有條理為一科曉達治
道為一科六科備者為上三科以上者為中三科以
下者為下不通一科者不在擢中從之五年廢諸科
詔禮部設科舉令天下三年一校試六年以有司所
取文詞可觀多鮮實效諭中書省暫罷科舉別令有
司察舉賢才以德行為本文藝次之十五年復詔禮
部設科取士十七年定科舉式命禮部頒行各省子
午卯酉年鄉試辰戌丑未年會試凡鄉試直隸府州
縣試於應天府各省府州縣試於布政司不拘額數
從實充貢第一場試四書義三道每道二百字以上
經義四道每道三百字以上未能者許減一四書義
主朱子集註經義易主程傳朱子本義書主蔡氏傳

及古註疏詩主朱子集傳春秋主左氏公羊穀梁胡氏張洽傳禮記主古註疏至永樂間頒大全凡經義主註疏者廢不用第

二場試論一道三百字以上判五道詔誥表内科一

道第三場試經史時務策五道俱三百字以上未能

者許減二凡國子學府州縣學之學成者儒士之未

仕者官之未入流而無公事註礙者各由縣州申府

申布政司鄉試其學官及罷閒官吏倡優隸卒與居

父母喪者不得預試主考官二員同考官四員先期

於儒官儒士內訪明經公正者敦聘提調官在內應

天府官在外布政司官各一員監試官在內監察御

史在外按察司官各二員供給官在內應天府官在外

府官各一員收卷彌封謄錄官各一員對讀官四員

受卷官二員以上皆選居官清慎者充之巡緝監門

搜檢懷挾四員在內從都督府在外從守禦官委用

試卷舉人自備草正卷各紙十二幅首書姓名年甲

籍貫三代本經會試殿試同先期赴所司印記試前二日

圖畫東西席舍間數編排試日一一搜檢懷挾片紙

隻字者扶出仍行本貫不許再試入席舍後每人用

一軍監守禁講問代冒及暮許給燭燭盡卷不成者

扶出文字迴避御名廟諱不許自敘辛苦門地卷成

交受卷官立簿收納類送彌封所密封舉人姓名用
印關防仍置簿編次三不成字號附書卷上次送騰
錄所硃筆騰錄次送對讀所一讀硃卷一讀墨卷對
同乃送考試官親筆點閱凡色筆不得互用試官入
院提調監試官封鑰內外門戶如送試官或供給公
同起鑰檢入即閉試官不得將弟男子姪親屬入試
徇私取中違者許指實陳告以上條例永著為令後
雖屢有奏請法加嚴密其大端類不出此二十四年
定文字格式凡試官所問經史須含蓄不顯使荅者
自詳以觀才識凡對策務在典要切實又令科舉歲
貢於大誥內出題或策論判語叅試之永樂元年以
建文四年未行鄉試命於八月補試六年庶吉士沈
升奏各省鄉試名數太多致懷僥倖不務實學宜勅
各布政司按察司務在精選毋多濫舉從之十五年
順天府及應天府鄉試始命翰林院春坊官主考賜
宴於本部及本府洪熙元年四川知縣孔友諒上言
六事其四曰慎科目言秋闈取士弊既多端僥倖過
半間有文學中式者實行或乖以致真才罕見今後
乞勅中外每遇開科應試之士須隣里保結資質端
重學業優贍者方許入試監試官先加考覈以辯真

偽命禮部會議行之審理正俞廷輔建言今科目取士不得真才實為濫舉於是定取士額數南京國子監并南直隸共八十名北京國子監并北直隸共五十名江西五十名浙江福建各四十五名湖廣廣東各四十名河南四川各三十五名陝西山西山東各三十名廣西二十名雲南交趾各十名貴州願試者就試湖廣宣德二年令貴州就試雲南四年令雲貴增額五名七年令順天府鄉試額取八十名九年順天府尹李庸檢舉科場詐冒事科道劾奏并及庸宣宗宥之正統元年令開科不拘額數三年鄉試初試場屋火主考曾鶴齡曰必更試然後可以滌弊而不枉士子從之五年定順天府仍八十名應天府百名浙江福建皆六十名江西六十五名河南廣東皆五十名湖廣五十五名山東四川皆四十五名陝西山西皆四十名廣西三十名雲南二十名六年令順天府增二十名又令考試官必求文學老成行止端莊者其年六十以上及致仕養病與署事舉人并年少學力未至者不得舉用其出題不許摘裂牽綴及問非所當問文取淳實典雅不尚浮華九年奏准各處應試生儒等從提學道考選在京各衙門吏典承差

人等聽本衙門保勘禮部嚴考通經無犯者送試景泰元年令開科不拘額數又令鄉試同考官五經用五員專經考試又令應試冊內原無名籍儒士及贅婿義男并文武官舍軍校匠餘不許於外郡入試八月順天發榜第一名劉宣係盧龍軍士同考欲更之主考劉鉉曰朝廷立賢無方不可乃止三年令在外布按二司同巡按御史推保見任教官年五十以下三十以上精通文學廉謹者聘充考官天順二年令兩京天文生陰陽生及官生子弟許就在京鄉試三年令兩京鄉試場詩書三經各增考官一員八年令

依親監生得就本處提學官考送鄉試成化二年定考試官俱於八月初七日進院謄錄對讀等官取吏部聽選官年四十上下五品至七品有行止者充之三年令雲南試額復增十名六年令監臨等官不許侵奪考官職掌七年中書舍人呂憲乞就順天府鄉試許之九年從北直隸提學言試錄刻舉人文字不許主考代作以妨校閱十年定在京科場事宜監試官都察院十日以前選公正御史同提調官於至公堂編次號圖提點席舍審察執役人等禁約希求考試聲譽十五年御史許進言國家以科目取士慎選

考官近各布政司每遇開科輒徇私情所聘考官多非其人以致校閱不精兩京命翰林主考故所取得人乞各布政司亦如兩京例命翰林官主考詔禮部凡聘主司有徇私作弊者究治之弘治四年令各處鄉試考官文章純駁悉聽去取不得簾外巧立五經官以奪其權如考官取士不當刊文有差連舉主坐罪又令提學官平時考定教官等第以備聘取五年令吏部聽選監生給假在家者許就本處鄉試其在部未考歲貢或在監告就教職監生及不係在任依親官生并天文生陰陽生例習他業者皆不許入試

七年申飭科舉條例令考官具舉主職名咨呈本部是年雲貴解額共增五名十三年奏准應試生儒舉人監生有懷挾及換寫試卷者充吏三考滿日為民十四年掌國子監謝鐸請重科貢以清入仕之路言各省考官皆御史方面之所辟召職分既卑學亦與稱恩之所加勢亦隨之以外簾官預定去取名為防閑實則關節內外相應而科舉之法壞矣乞勅兩京大臣各舉部屬等官素有文望者每省差二員以為主考庶幾前弊可革時遵舊制兩京同考官皆取教職多不稱使嘉靖六年張璁上言近來各省鄉試權

歸簾外官多通關節宜用京官臨時點差往典試事
其在兩京亦用科甲出身官分考從之七年各省主
考用科部等官二人同考於六科部屬內訪舉每經
一員隨主考官入院其餘仍用教職至十四年復罷
科部弗遣是年巡按王杏奏貴州諸生請就本省開
科從之定解額雲南四十人貴州二十人十七年禮
部尚書嚴嵩劾十六年應天試錄語多譏訕同考官
不書名大不敬逮典試官詔獄餘所在即訊嵩又摘
廣東試錄語多不經逮巡按詔獄餘行巡撫即訊二
十二年世宗手批山東試錄譏訕逮御史葉經杖死
闕下布政以下皆遠謫嗣後各直省監臨官總總慮
觸忌諱及進試錄必重賂權貴矣是歲應天主考浦
應麒以鬻科被論斥為民貴州巡按亦以試事削籍
四十年中允吳情典應天鄉試中同邑十三人時論
大譁科臣劾奏與副考胡杰俱謫外南直隸之在翰
林者不得典南試自此始四十三年增遣監場御史
二員先於門外嚴檢閱四十五年直隸提學御史耿
定向奏兩京鄉試主考宜簡學行兼優者勿拘資格
同考官廣取正備卷呈送主考如落卷中果有異材
即當收錄經書義宜嚴立程式每篇止許五百字以

上六百字以下中式硃墨卷發提學官鈐送京府各
布政司解部以防偽濫御史陳聯芳亦言重後場以
羅實學及令兩京主考一以文學去取毋以考官為
額數分房為次第俱充行萬曆元年令鄉試初場照
舊分經外其二三場改發別房校閱三場俱優者置
高選若初場雖善後場空疎不得一槩收錄四年令
場中坐號監臨提調官時掣籤印記坐後驗之是年
議准兩京全考教官有衰老者遣回北京於觀政進
士及候補甲科南京於附近推官知縣內取用五年
題准各房閱卷凡士子文字合式者除正卷外多取
備卷以次填入副榜不拘額數八年限經書義過五
百字者不錄十二年命禮部通行各省直鄉試硃卷
謄畢盡送內簾其墨卷封鎖外簾以杜私弊十三年
詔定科場事宜部議嘉靖六年曾議各省照兩京遣
官主試以與監臨禮部小嫌行之二科輒復報罷今
乞照往例於在廷諸臣訪其學行並優者奏請每省
二員先期差遣其他分考每經聘教官一人限三科
以上卓有文行者仍於本省甲科有司中選取數員
同充考試至於奉命典試應在監臨提調之上不得
爭競以傷大體自是各省主考視嘉靖七年例酌道

里遠近為先後浙江江西福建湖廣皆用翰林編檢
餘用六科給事中各部員外等官著為令同考官各
用甲科有司而教職祇存一二是歲黜順天冒籍中
式者八人謫提學御史於外仍諭天下御史各覈新
舉子削籍者十餘人十五年科臣言太省才多當加
房考禮部奏科場八事內言教官徵聘宜停止後場
校閱宜更換援例生宜號舍隔別附選生宜原籍考
送並從其議十六年命易詩書房考各增二員春秋
禮記各增一員於本省甲科有司內選用先是大學
士張居正子嗣修懋修及吏部侍郎王篆子之衡之
鼎得中式追論黜為民自後每每以科場蠹弊流言
四出右庶子黃洪憲主順天試請預申飭以絕姦竇
十七年正月禮部郎中高桂奏我朝設科取士二百
餘年自張居正倖門四啟王篆朱璉等尤而効之今
士子以僥倖為能主司以文場為市遂至上下相同
名義掃地乞勅九卿科道檢閱原卷以俟處分其餘
通行議處疏上命覆試所摘發無當革者桂謫外刑
部主事饒伸復疏論下伸於獄落職為民二十五年
順天鄉試被科劾二十八年順天江西湖廣鄉試被
部劾皆以文體險怪主考降調舉人黜罰有差三十

一年禮科言明旨所重者有三曰關節曰文體曰冒籍鑒別惟學臣秋闈校士責在主考與分考須擇有行誼文名者典試分闈各房閱完將正備卷總送主考從公裁奪毋拘多寡從之三十二年詔自今各省有宗學子弟入試與生員一體編號中式者即行登榜不許引嫌三十七年遼東增額五名四十年陝西增額五名順天府請行取河南山東教官二員分校又會議以後京闈斷自四十三年為始照南京事例檢取推知有文行者充用是年陝西鄉試改期於十九日南直鄉試改期於二十二日始試初場南御史言科場愆期考之往事正統戊午鄉試以初場災而改天順癸未會試又以災而改正德庚辰殿試以南征逆濠而改夫以承平之日舉祖宗大典變更是以不信之令令天下也不報四十二年部覆兩京各省內簾兼取隣省推官臨期分撥又量徵科甲教官一員以存祖制分經除易詩書外其春秋禮記孤經本地或無兩人則以隣省推官教官充之各直省援陝西遼東例請加額命浙江江西福建湖廣山東山西河南廣東四川各加五名廣西三名雲貴各二名兩直於常額外南直生員加七名監生三名北直生員

加六名監生四名又於應天更加三名浙江更加二
名四十六年以南直試卷三場不下二萬餘彌封等
所官各二員未易辦理增彌封謄錄對讀所官各四
員是年禮部數請點用試官不報各主考於七月終
命下應天陝西改期於八月十九日江西改期於二
十六日浙江湖廣改期於二十九日始試初場四十
九年主考俱於七月二十八日命下應天浙江江西
湖廣江南陝西試皆踰期天啟元年以首科詔加額
兩京五名大省三名中省二名下省一名命宗生聖
裔中式名數各如額外勿拘人數以皇考妣於八月

二十七日發引順天鄉試三場俱改先期三日二年
禮科惠世揚奏請正文體詳批閱禁撓越董後場信
功令速題紙六事詔悉行之四年禮科魏大中以南
服弗靖請雲貴鄉試彼中撫按便宜行事命雲南早
與題差貴州暫倣壬午前例聽御史便宜行山東江
西湖廣福建主考於策問內刺譏時事皆降諭切責
貶級調外已御史疏劾江西主考復擬罪餘褫職七
年命遼東照甲子例中一名於東省俟庚午秋屬順
天中四名崇禎四年正月諭該部科曾於鄉試前條
奏正文體剔奸弊諸款已奉旨允行今試事久竣其

間有無踪跡詭異議論昭彰何未參駁一人着同該
科照前項事理速奏部科覆劾有差六年禮部以賓
興屆期疏奏八款一崇經二依傳三切題四尚體文
體遵萬曆年間所刊舉業正式為準五達辭六讀史
七革偽士子有竊偽書者必斥至於竺乾之書若用
首場雖遵制必斥八識務取士須參酌後場能舉大
義而中機宜者至於文事各兼武備若諸士中有能
淹貫七書及百將傳而發揮中竅尤當亟收以備中
樞節鉞之選皆允議行六年工科疏奏賓興之典慎
重考官屢奉明旨乞命所司嚴加採擇不許規避攙
營十三年論文章關乎氣運棘闈較士初場取發明
聖賢義理二三場取學識經濟有裨世用邇來文體
不端全賴典試者釐正挽回乃程錄先不堪觀何以
為多士之式直省試錄瑕類種種宜加罰治以後錄
獻之文務期純雅正大以為士子正鵠十五年河南
以寇亂停鄉試十一月巡撫王漢請急復中州鄉試
以收人心部議未果十六年正月禮科疏請速議令
按臣相事度勢與撫臣酌行明鄉試終於此

明史卷七十二

選舉二 科目下

武科目附

志四十六

明初鄉舉以人材多寡為限數不過由十人會試祇百人其後就試禮部者多至五六千人士非會試不得進非進士雖登用不得至顯官於是會試為尤重會試自洪武四年始先於三年詔凡鄉試中式者行省咨中書省判送禮部會試其明年二月命禮部尚書陶凱前翰林院學士潘廷堅為主考官取中俞友仁等一百二十人時提調官中書省二人讀卷官祭酒等四人掌卷受卷彌封官各主事一人對讀官司

丞編修二人禮部提調官尚書二人十九日太祖親製策問試於奉天殿吳伯宗對稱旨擢第一賜袍笏冠帶第一甲三名賜進士及第第二甲一十七名賜進士出身第三甲一百名賜同進士出身二十日午門外張掛黃榜奉天殿宣諭二十日賜宴於中書省六年復諭中書省停罷科舉時鄉貢舉人未及會試太祖召試便殿命題賦詩以張唯王璉等入文華堂肄業以方徵彭通等入武英堂紀事十七年始定科舉式頒行直省凡鄉試中式舉人出給公牒官為應付廩給脚力赴禮部印卷將鄉試文字咨繳照驗以次年之二月初九日會試試以初九十二十五日為三場其條例與鄉試同十八年命待詔朱善典籍聶鉉為會試主考官取黃子澄等四百七十一人三月廷試賜丁顯練子寧花綸等進士及第出身有差先是設進士科未有入翰林者入翰林自此始諸進士以未更事俾觀政諸司然後擢任在翰林承勅監等衙門者稱為庶吉士在六部諸司者仍稱進士進士有觀政之例庶吉士之名始此二十一年廷試中式舉人施顯等九十三名一甲一名任啟泰襄陽人太祖命有司建狀元坊以旌之建坊始此二十四年會試

舉子六百六十餘人取三十二人大率二十人取一人太祖以數少擢下第張孟鏞等二十七年取九十人三十年命翰林學士劉三吾安府紀善白信蹈為考試官取宋琮等五十二人三月廷試以閩縣陳郊為第一中州西北士子不得與選命侍讀張信等十二人覆閱後下刑部窮究悉誅之惟三吾宥戍邊戴彞尹昌隆僅免太祖親閱卷取任伯安等六十一人皆北人六月朔賜韓克忠等進士出身有差時故有春榜夏榜之目永樂二年補會試太宗問洪武取士數禮部尚書對曰多者四百七十餘人少者三十餘人太宗以初即位姑從其多者命如洪武十八年所取進士額傳臚之次日復進副榜臨策之三年命學士解縉選才識英敏者俾就文淵閣進學於是縉等選修撰曾棨等三人庶吉士楊相等二十五人凡二十八人庶吉士周忱自陳年少願進學增忱為二十九人命司禮給筆札光祿寺給朝暮膳禮部月給膏燭工部擇近地宅居之太宗或時至館程試或召問驗所學每五日一休沐使內臣隨之校尉騶從人以為榮四年取中進士二百一十九人復親試下第舉人得二十一人七年己丑取陳璉等八十四人適

帝北巡詔璲等留監讀書九年三月補廷試賜諸進士宴於會同館十三年會試天下舉人於北京取洪英等三百五十人命翰林院再試下第舉人續取二十四人並賜冠帶給教諭俸送國子監進學以待後科二十二年廷試取孫曰恭第一以其名近暴字更取邢寬仍用朱書填榜以示異洪熙元年奏准會試取數臨期請旨不過百名時仁宗與大學士楊士奇論科舉之弊士奇曰自古取士兼用南北今請試卷外書南北二字如一科取百人南六十北四十則南北人材皆入用矣仁宗韙之命禮部議行亡何宣宗

即位復命分南北中卷北直隸山東河南山西陝西為北數南直隸蘇松等府浙江江西湖廣福建廣東為南數四川廣西雲南貴州及鳳陽廬州二府徐滁和三州為中數取士以百名為率南數五十名北數三十五名中數一十五名會試分南北中卷始此宣德二年策試舉人宣宗謂侍臣曰文章論議本於學識此在朝廷激厲成就之有道也爾等其精擇之是科賜馬愉第一愉山東人前此南北合試未有北士居首選者有之自愉始五年廷試宣宗曰朕於取士不尚虛文欲得忠鯁之士為用其間有若劉蕡蘇轍

能直言抗論者當顯庸之於是賦策士歌以示是年
賜諸進士宴於中軍都督府八年賜諸進士宴於禮
部著為令正統元年祭酒陳敬宗奏言比者解額有
定副榜數少以致天下教官類多缺員吏部遂兼考
監生補授教職往往僥倖選列竊以為縱使科舉取
人之濫猶愈於監生考試之精請量寬解額專取之
於副榜庶幾教導得人賢才無滯於是議增科目有
差五年增會試額為一百五十人七年刑部吏南昱
公陵驛丞鄭溫皆中式十年用教授一員教諭二員
為同考官兵部尚書徐晞戶部侍郎奈亨俱以吏員
充廷試讀卷官十三年用教諭二員訓導一員為同
考官景泰元年令會試士子合格者通具中數臨期
奏請定奪又令會試凡受卷彌封謄錄對讀等官聽
於吏部選用五年禮部尚書胡濙奏請會試同考官
以翰林院官及春坊官主其事兼取京官之由科第
而有學行者教官不許以充數從之天順元年令考
官不拘額數務在得人是年官制初變尚寶司少卿
錢溥司丞李業翰林院典籍皆為會試同考官四年
下第舉人奏主考官徇私覆試下第等不中選罪其
首以徇七年試日場屋火死者九十餘人俱贈進士

出身改期於八月會試八年三月始廷試憲宗以大
喪未踰歲御西角門策之成化二年令本部官一員
提督供給是科試錄五經各刻文三篇二場刻詔一
篇舊例詔誥表惟科表一道刻詔變例也三年詔於
會試年多取副榜舉人除授學職二十五歲以上者
不准辭避其考滿該陞願會試者聽五十以上者不
准入試十七年禮部以詩易卷多乞每經各增同考
官一員從之二十二年定南北卷又各退二為中卷
時內閣葛安禮部尚書周洪謨皆四川人蜀川布政
使潘楨言額數不均因定議二十三年命舉人授教

官六年有功績者許會試弘治二年南京禮部尚書
黎淳奏言會試取士自宣宗命大臣會議始分南北
永為定制近因潘楨建言將南北二數各退二名添
與中數妄加損益宜復宣德丁未所定數目從之四
年劉吉奏定舉人三科不中者不許會試旋不行七
年增受卷彌封謄錄對讀官十六員十二年令署職
教官照成化二十三年例許會試若移疾告假久不
入選者不許是年大學士李東陽禮部侍郎程敏政
主會試給事中華昺劾敏政鬻題命東陽覆校取倫
文敘等三百人給事中林廷玉復論敏政可疑六事

并鞠之敏政等斥謫有差正德三年太監劉瑾錄姓名五十人付主司因廣額三百五十人六年大學士楊廷和子慎廷試第一舊例殿試讀卷官用祭酒修撰等其後率用內閣大學士等其受卷彌封掌卷等從內閣於翰林院及春坊等官并制勅房官內推選與各衙門相兼執事凡輔臣有子入試其父引嫌不讀卷其子得及第自三年內閣焦芳以子黃中首三甲意不憚降調諸翰林嗣後宰輔子多高擢矣十五年庚辰武宗南巡未及廷試次年世宗即位五月御西角門發策親試之先是廷試彌封官輒以會試前列數卷潛送內閣內閣或密覘狀貌及聲名為次第

閱卷官得自東閣出歸私第嘉靖五年禮部尚書席書疏其弊乞彌封官不得預送卷讀卷官宿禮部從之十一年禮部尚書夏言奏准士子經義論策各有成式邇來文體詭異舊格屢更請以浮誕碎裂壞文體者皆擯斥十四年世宗親著策問并親定一甲等名次二十二年廷試少傅程鑾二子汝儉汝孝俱在試中世宗覽策疑二人濫首甲抑第一為第三以第三置三甲發卷果汝孝大疑之科臣交劾考試官江汝璧朋私通賄大壞制科下廷鞠鑾坐免二子斥為

民汝璧等擬罪有差三十二年廣會試額四百人其
後惟癸丑及乙丑戊辰辛未四科同之餘科仍取三
百人四十四年御史李邦珍等條上革弊四事一舉
人試卷禮部鈐送提調官收領入場驗給以防洗改
交換之弊一請留朝覲二司及府縣官臨期督集所
屬舉人點驗序進以防冒籍代筆之弊其二謂叅處
不服搜檢舉人及場外多設軍士巡邏詔皆允行萬
曆五年廷試少師張居正少保呂調陽王崇古以子
嫌請避八年十一年宰輔子各以子中式辭避皆不
允御史魏允貞疏論輔臣子不宜中式仍謫外十一

年以覃恩增五十名十四年禮部請廣額命取三百
五十人又議經房額設一十七員易經卷多合增一
房從之十七年部覆四款其一慎校文初場限五百
字論策限千餘字其冗長怪誕引用佛經等語照辛
未科摘發戒飭其一免送試司府有總轄之責州縣
有民社之寄乞勅各直省府佐官候點舉人其司府
首領并州縣官無得留滯其二謂防失卷嚴謄錄悉
從之二十六年部覆一文體一程式一閱卷一出題
以各經書分第掣籤同考官各擬一題聽主考擇取
一調房孤經考官不許與他經調閱二十二年三十

七年禮部侍郎李廷機吳道南各陳科場事宜皆允
行四十一年照癸未丙戌己丑等科例取三百五十
名四十三年部議會試中式類以三百名為額今海
內人文日盛各省鄉試增額况今山東山西河南諸
處皆有題請甲科為縣令之疏似當議增以三百二
十人為定額至於房考諸臣翰林科部皆有定員惟
本部無之合增設本部司官一員充同考試官以便
分閱俱依議四十四年禮科言房考之設以試卷多
寡為增減萬曆癸未以前會試祇十七房詩五易書
各四春秋禮記各二自癸未以易卷多省書之一以

增易房仍十七此分經定額也十七房用翰林十一
人六科三人六部三人此衙門定額也至丙戌書卷
復多而易不可裁增為十八以翰林充今議再增一
人以禮部充六科可獨缺乎下部議增為房二十四
十一年廷試第一為科道論罷四十四年會試第一
名第六名以真草皆同被劾除名四十七年廣額五
十名共三百五十名著為今天啟二年正月禮科惠
世揚疏奏國家創制雖三途並用大抵尤重南宮一
選按近年如癸丑丙辰己未制額俱定於三百五十
人在今推恩當破格增額考宋太平興國之際入彀

者至五百今若未盈此數亦須於三百五十名之外
大增其額又奏會試事例一一所當申飭者一正文
體一禁撓越考官於場中託言搜卷巧取私人如庚
戌之事至今為世道之蠹今欲痛懲其非不許隔房
撓取一重後場一信功令責成外簾官各盡職掌以
釐諸弊於彌封各役厚其工資繩以重法而騰錄對
讀尤當申飭一速題紙皆奉旨嚴行崇禎元年以登
極廣額五十名四年禮臣以邊方需人請加會試額
從之七年命舉人槩令考察方許會試十六年禮科
疏奏殘疆整頓急賴新劄而銓曹待選絕無甲榜日

蒙會試加額六十名已為異數而幹理時艱終當於
科目求之祖宗朝有廣額至四百七十名及四百名
者而畿輔中州山左俱係北卷或於廣額中多取北
地以收人地相宜之用命酌行之時流寇外訌勢岌
岌禮部請停會試命於八月舉行九月十五日殿試
廣額至四百三十五名而觀政甫三月京城陷不可
為矣終明之世二百七十餘年鄉會試未之或改等
而上之至殿試極重矣而人徃徃急於會試者以殿
試率因會試之所取為尤要也初太祖敦崇儒學首
以四書五經義為制舉因沿既久士之取舍類決於

首場於是制義為天下所爭趨趨之者衆其蠹以滋起時所謂夤緣而屢見於糾劾者也越自嘉靖至萬曆寢尋極敝迄於標季而益潰壞不可救人或以謂制義不可以為法不知八股者法之藉非法之所由立也當其始未嘗不可以為弊顧時方勵廉隅持志分人耻而不為迨文教不修士習渙泐雖加之嚴禁弊乃逾多而後知天下事務之美惡始因於治術卒中於人心法固不得而主之也至於文體代有申飭然萬曆間不無稍變迨天啟子丑忽化而為詭怪盡失其初崇禎之際雖再三剔厲終於莫挽而國變隨之嗚乎一代典制之所存雖若科目者以文章之末而汗隆亦關乎氣數勢使然耳

太祖吳元年定文武二科令武科先試其謀略次觀其武藝洪武二年遣官祭昭烈武成王如釋奠孔子儀二十年禮部奏請如前代故事立武學用武舉仍祀太公建昭烈武成王廟太祖不從正統初始命兩京建武學復武成王廟奏定條格儲養訓練以備任用其子弟於各直省應試天順八年令天下文武官舉通曉兵法謀勇出衆者各省從撫按會同三司官考試直隸從巡按御史考試中式者送兵部會同總

兵官於帥府試策略教場試弓馬答策二問騎中四
矢步中二矢以上者為中式答策二問騎中二矢步
中一矢以上者次之成化十四年太監汪直奏請武
舉設科鄉會殿試悉如文科例下兵部議行仍命於
數年後具奏處置弘治六年命武舉六歲一行已又
令先策略後弓馬策不中者不許騎射十七年始令
倣文舉例三年一試出榜賜宴正德三年令諸色人
有究極韜略精通武藝者開科之歲赴所司投報十
四年兵部題在京武舉鄉試本部侍郎一員南京兵
部尚書會同各府并錦衣衛掌印官考驗都察院各
差御史一員監試在外布政司於所在教場或貢院
考驗初場試馬上箭以三十五步為則二場試步下
箭以八十步為則各以彀弓平矢直衝中央為中式
三場試策一道務簡要含蓄以觀才識每子午卯酉
年十月鄉試先於各衛所起送都司府州縣達布政
司類送巡按御史會同三司官考驗定數仍行都司
起送五府轉送兵部兩京衛所俱送中府會同考定
類送兵部嘉靖元年兵部議定於文舉鄉試年行移
天下招諭各色人等堪應武舉者從巡按御史於十
月考試兩京武學於兵部選取俱送兵部於次年四

月會試初九日初場較騎射十二日二場較步射十五日三場試策二道論一道先期請翰林院官二員為考試官給事中并部屬官四員為同考試官取中名數臨期請旨仍出榜於兵部門首次日赴中府會宴蓋至是而武舉差與文舉侔矣十七年令武舉俱於九月會試十九年罷武科鄉舉二十二年令武舉倣會試南北卷例分邊方腹裏每十名邊方取六腹裏取四三十二年定武舉三次中式者不拘官舍軍民免其再試該衙門給批赴京會試三十年令應試人等各該官嚴加考選不拘名次監生省祭官生不

許應試隆慶二年太常寺少卿武金請於蕪收並用之中寓隨材器使之術部覆軍民人等力勝三百斤以上及有武藝者每年許自投州縣送巡按考校其兼通策論者聽隨武舉入場俟場畢御史公同考試將智勇俱優者為一等精通一藝者為二等給文到部萬曆五年武舉用御史二員監試有催倩懷挾者照文舉例行十一年兵部言武舉當如會試規格一場馬上四箭准入二場步下二箭准入三場論策俱完准中式取額悉照順天鄉試之數不及數者不必取盈二十三年兵科奏稱武科之設原以騎射為主

末場論策觀其韜略不取浮華騎射既精方略可採
即點綴不甚工不宜輕棄從之三十八年會試天下
武舉取中進士一百名命賜宴四十一年詔增武舉
額三十名兵部奏請武試宜兼較拳勇不拘刀鎗劍
戟方角陣法等項各占一藝如果精通不必責以鈐
略四十六年甘肅巡撫奏河東五道河西五道材官
所出前巡按御史議開河西武闈已另額取武舉三
十名河東乞一體應試臨鞏兩郡宜併入一闈改設
鞏昌仍以三十名為額四十七年科臣請特設將材
武科初場試馬步箭及鎗刀劍戟拳搏擊刺等法二
場試營陣地雷火藥戰車等項三場各就其兵法天
文地利所熟知者言之報可天啟二年吏科請文武
一例殿試言先曾榜招天下智勇竟無一應今大比
武士與其召募於不可得之數孰若乘其群然赴闕
下而擇之而精練之為便哉凡此入彀多士再以考
選之法參酌其間職方司會同九卿科道諭令各陳
所能先期演驗部臣閣臣商訂揭進一聽欽點傳臚
當武臣進用之始而儼然廷試豈不赫赫盛舉哉議
不果行崇禎元年命照例增武額二十名四年發武
榜南北士大譁命中允方逢年倪元璐再試取翁英

等一百二十人逢年元璐以時方需才奏請殿試傳
臚悉如文例從之賜王來聘等及第出身有差著為
令武舉殿試自此始十年武闈二場值大風諭令士
子有技勇馬箭合式而步箭或未中者准入三場後
不為例十四年諭各部強兵之策要惟任將今欲特
開科目一曰奇謀異勇科使海內人士望的而趨有
以自見至訪求考驗徵辟選舉更須良法盡善務期
豪傑傾心弓旌生色以稱破格旁求至意然詔下無
應者自承平日久士大夫諱言兵革武途逾輕介胄
之士不復與薦紳為伍崇禎時世方多故懷宗汲汲
尚武冀得奇材一收其用即文闈榜後必相角射以
為故事欲使文臣兼習武事天下或有起而圖功者
而積衰之餘莫能再振卒之上下相隳廢以至敗亡
云

明史卷七十三

志四十七

選舉三 學校上

明之取士稱為正途者約有三曰進士舉人貢士貢途之得與科甲並稱以起學校也明初命天下府州縣學選士而貢之嚴考校始擢用用輒不次得顯官迨後貢者日益衆限之以歲白歲貢率以食廩為先後循資躡序為期甚久及貢禮部咨監肄業復撥各衙門歷事而後得咨吏部以候選雖有奇材異能至補授之日往往精力衰頹不能以暮氣少効其驅策以此故也其後由各提學考試者曰選貢由恩例選

充者曰恩貢之二者雖稍踰於常格而歲貢輕恩選亦不得重焉蓋於當時三途並用之意少差矣洪武五年天下貢士至京師命選其年少者入國子監讀書講明律令十六年令考試天下歲貢生員送監肄業諫院右司理閔賢奏言教養無法選貢混淆至有缺員又或府選于州州選于縣使為師者不能各任其責至布按二司將生員選充承差有垂朝廷育才之意今宜府州縣學歲貢生員各一人如考試中式則賞及有司教官否則所司論如律教官停其祿生員罰為吏則士知勸懲學有成效從之命府州縣學

自明年為始歲貢生員各一人以正月至京就翰林院考試四書經義各一道判語一條中式者入國子監不中者罰如例十八年令歲貢不中式者復學官吏以貢舉非其人罪之教官訓導罰俸一年貢不如期以違制論二十一年令府學一年州學二年縣學三年各貢一人必選資性純厚學業有成年二十以上者二十四年復定歲貢不中罰例有司官以任久暫為差教官例如前生員食廩五年者充吏不及者復學二十五年初令府學一歲貢二人州學二歲貢三人縣學一歲貢一人二十六年令四川土官衙門

歲貢生員免考送監二十八年奏准歲貢初試不中者復學停廩限次年再試兩廣四川限兩年再試又不中者充吏三十年令不中復學者免其停廩永樂元年令廣西土官衙門如雲南例生員有成材者不拘常例舉貢如十年以上學業無成就本處充吏四十年禮部言廣西歲貢生員考不中者二人教官當罰俸提調官當杖太宗曰遠方之人漸化尚淺命宥之八年令凡州縣戶不及五里者每州一歲貢一人每縣間歲貢一人十五年平交趾命郡縣建學以生徒選貢十九年令歲貢生員起送到部有事故者不許

補貢二十二年禮部奏送歲貢生翰林院考試仁宗召楊士奇等諭曰百姓不得蒙福由守令匪人守令匪人由學校失教歲貢中有不通政事不明道理者豈可授官自今嚴考試法不在文詞之工拙但取其有理致者取之嚴則不學者不復萌僥倖之望而有嚮進之志矣又諭禮部曰太學聚天下之士教之以備任用蓋因其已成而益充之今郡縣歲貢生率記誦陳言以圖僥倖宜勅有司督學官嚴訓誨必通經成材方得充貢宣德六年以監生入仕者多在監者少命貢額如洪武三十年以前例正統四年令生員

科舉停支廩米准作食糧月日充貢六年令府學每
歲貢一人州學三歲貢二人縣學間歲貢一人自此頒
行貢額為定例七年令歲貢精選端重有文及通書
算者天順中令歲貢生員取考科貢開除廩米月日
作數若同案食糧以名籍先後為次先是天順元年
設提學道校官景皇帝即位罷之考貢由巡按御史
及布按二司至天順六年復設提學官勅諭歲貢年
深不堪者即以次名充貢成化元年令孔顏孟三氏
學二年貢一人二年令衛學每二年貢一人四年令
雲南貴州選貢仍照舊例考送又令歲貢已起送或

事過一年外者不許補貢其丁憂正服月日准作實
數養病侍親及服闋不復學者皆作虛曠禮科給事
中成實奏言以堂堂國學雖納粟者皆得肄業其中
何獨于此數人不能容哉乞自今不分年月久近准
令次貢考補詔從其言十二年禮部言南方府縣貢
生考中者例送南監景泰間因北監數少暫留充撥
今宜仍舊從之十六年令歲貢不分軍民生俱聽提
學官考試凡京學二年貢三人軍民指揮司衛學照
府學例軍民生間一年貢一人都司及土官照州學
例三年貢二人十七年貴州程番府新立學校命歲

貢一人弘治八年奏准自九年至十三年順天應天
二府四年各該貢六名者許貢一十二名餘府州縣
貢數悉視舊額倍之十四年令州學四年三貢其雲
南四川貴州諸處一年一貢土官及都司學照先年
事例三年一貢其萬全都司一年一貢凡廣西雲貴
四川湖廣等處有冒籍生員食廩起貢及買起送公
文頂名赴部者俱發口外為民賣與者追直治以罪
又令歲貢生員願授教職雖係南監亦送北監于一
年內按季考試能通三場文字委係家貧親老者許
咨吏部考送廷試取中選用不中者還監仍行各提
學官嚴考貢法不許姑息起送十七年南京國子監
祭酒章懋疏言我國家稽古制治尤重太學以敦化
原洪武永樂年間生徒動數千計教育之法至為周
詳今本監見在之數科貢兩行共止六百餘人歲貢
積累歲月挨次而升無可與共學之資而衰遲不振
者十嘗八九夫歲貢之入監既由挨次而舉人之坐
監又每後時故差撥嘗患于不敷教養尤難于見効
近年有增貢之舉而所拔亦挨次之人資格所拘英
才多滯乞于常貢外令提學行選貢之法不分廩餼
增廣生員通行考選務求行著鄉閭學通經術年富

力強累試優等者乃以充貢通計天下之廣約取五六百人照依地方分送兩監今年首行一次以後或三年或五年量在監人才多少歲一行之則人才可以漸及往年部覆今後貢生願就教職者照舊送監肄業果有能通三場者起送取中選用不中仍復監大率如十四年例懋復奏凡歲貢諸生得廩必二三十年而後貢迨入監遠者十餘年近亦三五年而後撥歷歷事又一年而後挂選已及五六十歲又待選十餘年而後得官則其人已老而死亡者亦不少矣是國家虛費糧米數百石以養一人而不得一日之用

豈不重可惜哉必清之于學校責令提學憲臣嚴加考選次清之于國學照依先年命大臣揀選法待挂選之時吏部就考定之高下使待選于家行各處撫按及司府正官凡有公事委之幹辦驗其能否歲終開有實跡造冊奏聞其材識優長者即行取選詔下所司正德三年令大寧都司學一年一貢十一年令遼東都司學每年一人充貢十二年令陝西都司學一年一貢十三年令廣寧等衛學照州學考貢嘉靖二年令順天應天府學每年充貢二人貴州宣撫司學一年一貢六年訓導金廷桂奏言舉人教職得

應會試雜職胥吏咸得與試至于師儒之官獨無科目之望實亦聖朝闕典宜令歲貢教職歷任三年教有成效者與諸生一體應試仍限名數不許過多以妨常額則歲貢正途可與諸色役人兼收而朝無棄物野無遺賢矣部議允行歲貢教官得與鄉試自此始是年令歲貢生員取四人陪考優者充貢九年復以一人陪貢十年令提學官考選應貢者于歲考時即行詳定如廩生考居一等不拘名次查取食廩年深者起送如無許于二等十名以前照前題送不必下及增附十一年命今後歲貢務選學行俱優者令與計偕若廩內不獲則增附內選之不得貢非其人
是年禮部奏歲貢法世宗曰督學官曠職甚自後所貢不入格至三人者落級五人者對簿貢士至京不如期者秋月不得補試十四年令于食糧年深者嚴加考試不堪者照例罷之以其次考充十八年詔天下歲貢生員應貢到部有年老不願仕者與正七品散官隆慶二年以開貢本為求才命各提學官嚴選勿濫如廷試發回三名以上者提學官以不職論貶一級萬曆二年令提學官每歲考定應貢給卷起文限次年三月十五日前到部禮部題請于四月內

廷試試畢願就教者禮部考送吏部覆請于六月內
廷試如三月不到壓次年候考三年令府州縣提調
官依生員食糧次第取六人送考提學官擇優起貢
其衰邁者不准如該貢生員未經到部遇有事故另
取一人補貢十一年令歲貢送考一正一陪十四年
令四川建武所生員照疊溪青州二所間歲起貢其
建昌越雋會川鹽井寧番松潘六衛皆以間歲為期
十六年廷試天下歲貢生上中卷准貢下卷發學仍
將提學官例究又令各直省凡起送貢生必年六十
以下三十以上依廩次為定正貢一名陪貢五名內

擇學業素優者一人十九年禮部奏稱國學空虛人
才稀少乞于正貢額外選貢府學五年一選州學七
年一選縣學十年一選都司衛所學倣府州縣俱送
南北二監肄業從之二十三年改用輪年輪省選貢
二十六年復首貢如故二十七年議行選貢工科郭
如選疏言選貢非祖制也其始欲補歲貢之乏而其
後遂妨歲貢之途使與選者皆才即散處庠序終當
自奮使與選者未必皆才遲之數十年依然一老博
士也而徒啟倖進之竇竊以為停之便帝以為然三
十一年令平越安順一年一貢黃平新貴各三年一

貢三十二年命歲貢試期定于四月十五日初試五月十五日再試著為令是年令遵義軍民府學自萬曆三十年為始二年一貢真安州學照建武事例以十年之後開貢三十四年詔歲貢出身艱苦自今廷試後准冠帶不願仕者遙授職銜其歲選兩貢入監者仍多優選以示風厲四十一年令四川龍安府平武縣學歲貢如州額真定州歲貢如府額四十三年許顏曾思孟四氏學一年一貢先是議開貢例是年禮部奏言貢士以次升者為歲貢以不次升者為選貢恩例偶行者為恩貢未聞有以貨進者自納貢例

行正途益混宜斷不行從之已復以餉例暫開四十八年命試過歲貢生分送南北兩監讀書其就教職者咨送吏部覆試光宗即位御史言異途尚可權宜正途必難假借請罷餉例開納生員歲貢二款以安士心以培士氣天啟元年以貢途壅滯當酌為疏通恩貢命再考一次其歲貢如故四年部議陵工暫開貢例科臣言國家三途並用除鄉會兩榜外額貢循資恩貢考選皆以文字為致身地天啟二年以陵工議開科道臣力持不可三年以濟邊議開各款惟例貢獨停頃以陵工暫開遂一往不返夫陵工則十月

已報竣可以止矣若曰濟邊雖盡天下之庠序而貢之母乃猶未足乎廩生經學臣優取盡一時譽髦今一趨于賄士風日下不可者一富者出之囊中貧者出之借貸仕宦之捷徑取償于他日欲世不濁民不窮得乎不可者二兩部取數既多吏部選法益壅正缺又少勢必與貲郎等是以正途為餌而愚天下之寒生也不可者三疏入不報崇禎元年命天下府州縣學各加恩貢有差六年御史祁彪佳奏言作養人才宜照御極初年選貢之制稍加恢廣七年御史韓一光疏言援納既止國學空虛宜開選貢之例從之

八月傳諭年深廩生學業荒疎濫與充貢殊非取才初意其舉貢入監肄業詳查典制及萬曆年間事例確議行之十一年令歲貢自六旬以上者免其廷試冠帶榮身仍以學行兼優者挨次取補蓋時之拘牽資序若此明初有貢無科目所中舉人仍以貢為名洪武末令天下府州縣每歲一起貢于是貢自為一途始與科目分其後科目日以重貢不得不日輕先是重首貢陪試止一人迨陪試三人至五人輪校之說卒不能行以至輪年輪省逾失其故矣大約弘治以還貢法寢壞上既以為正途之疣贅下亦以為末

路之要歸于是納例起而并及之例及之而立法之初不可復觀矣洪武中雖有稅戶人才之舉皆因才以任用而例特其名故如嚴震鄭沂者登用至九列若後之貢例直以其途為不足取而濫予之而名位亦罕進此薄其資而以為市貢之所以極敝也

明史卷七十四

志四十八

選舉四 學校中

明時以國學為人材之總萃凡天下所貢士從肄業自舉人及學生廕生胥隸焉因有舉監貢監例監廕監之目顧其初以人才專取于太學所為教也亦備具舉積分之法歲歲嚴行若歷與差固一時之偶試也迨積分廢僅以歷之正雜差之長短為分別其用已偏至以納例入其中益為變法以從例而法幾亡矣蓋法之存者可勸而其亡者可戒也故歷紀其始末以備觀焉太祖于乙巳歲置國子學以元集慶路

儒學為之吳元年定國子學官制洪武元年令品官子弟及民間俊秀能通文義者充國子學生自是田野秀民執經就列與貴游齒者日盛有官生民生之日焉四年詔擇府州縣學諸生之俊秀通經者入國子學養其德器至老成他日朝廷有大論建大製作以畀之五年擇貢生年少者黃昶等入國子學讀書講明律令六年又擇國子生少年聰明者李擴等入文華武英堂讀書謂之小秀才又禮部奏舉人年少者趙惟一等三十四人送國子學讀書八年置中都國子學十年令武臣子弟入國子學諭之曰朕定天

下以功世祿其子弟鮮知學問宜令讀書通古今俟有成立然後命官庶幾得其實用十四年改建國子學于鷄鳴山下命國子生兼讀劉向說苑及律令十五年改國子學為國子監中都國子學為中都國子監頒教條及禁例子天下本監祭酒司業為堂上官監丞博士助教學正學錄典籍掌饌為屬官典簿為首領官每旦正官升堂就坐屬官以次序立啟事質疑皆拱立聽受監丞叅領監事凡教官怠于師訓生員之戾規矩者並得糾治諸生每月朔望日給假餘日以會講復講背書輪課已又增定條例命教導諸

生以孝弟忠信禮義廉耻為本每班選一人充齋長
俾督諸生工課監丞置集愆冊不遵者書之初犯紀
錄再犯三犯決竹篋四犯發遣安置下及堂宇宿舍
飲饌澡浴皆有禁例生員每日公同飲食曰會饌其
監生有家室及雲南四川土官生加廩之十六年宋
訥為國子監祭酒嚴立學規太祖慮功臣子弟有不
率命太師韓國公李善長等考定教官生員高下分
列班次增立監規八條又命曹國公李文忠兼領監
事繩核之乙丑戊辰兩科所策進士恒在太學及任
亨恭廷對第一詔訥褒賞撰題名記立石監門太祖

既崇重國學數加優賜孝慈皇后亦積糧監中置紅
倉二十餘舍以嘉惠諸生之有家室者時日本琉球
暹羅諸國官生皆入監讀書輒加厚賜并給其從者
是以永樂宣德間仍之成化正德時琉球官生有至
者是年分二司業左右各提調三堂生員凡通四書
未通經者居正義崇志廣業堂一年半以上文理條
暢者升修道誠心堂又一年有半經史兼通文理俱
優者升率性堂凡生員坐堂各堂立簿橫列姓名于
上其下畫十方通為三十日印紅圈計之積圈至七
百以上許升率性堂升率性堂許積分積分之法孟

月試本經義一道仲月試論一道詔誥表內科一道
季月試經史策一道判語二條每試文理俱優者與
一分理優文劣者與半分紕繆者無分歲內積八分
者為及格與出身不及者仍坐堂肄業果有才學超
異者奏請上裁又令天下按察司選生員年二十以上
厚重端秀者送監考留十七年令考中歲貢生員送
監再考等第分堂肄業十八年令會試下第舉人送
監卒業二十五年二月詔祭酒與翰林院官考定六
藝以禮有職掌樂當別議惟定射及書數以聞三月
頒射及書數總目于國子監二十六年革中都國子
監以其師生并入國子監二十九年令魏國公徐輝
祖及禮部翰林院官同詣監考試仍令吏部以次錄
用六月初令監生年長者分撥諸司歷練政事三十
年復頒規條于國子監曰各堂教官所以儀表諸生
必躬修禮度率先勤慎毋惰訓誨使後學有所成就
斯為稱職諸生每三日一背書日讀御製大誥及本
經四書各百字熟記文詞精解義理或有疑難則謙
恭質問務求明白不許凌慢師長升堂背書必依班
序立不許攙越每月作本經四書義各二道詔誥表
策論判內科二道每日習書二百餘字以義獻智永

歐虞顏柳諸帖為法各專一家必務端楷旦暮升堂必衣冠嚴整步履中節坐堂必禮貌莊恭不得脫巾解衣往來別班食饌必恭敬飲食不得喧譁朔望隨班謁廟畢方許與假出近遊訪一應事務必先告本班教官令堂長率領升堂告與祭酒可否行之每夜必在監宿歇雖有諸司辦事者亦必回監不許羣聚酣飲遇有選人除授及差遣辦事從祭酒公選違者罪之是年定監生省親畢姻回籍限期各依道里遠近為差丁憂不計閏二十七月違限者亦依遠近計其年月罰充吏三十一年違限監生二百二十人命

吏部銓選遠方典史以困役之建文元年錄吳黼為國子生以黼父雲死節雲南廕以監廕子入監自此始三月詔副榜舉人年二十五以下願入監者聽十月定監生歷事考覈法分上中下三等引奏上等不拘選用中等下等仍歷一年再考上等者依上等用中等者不拘品級隨材任用下等者回監讀書三年命監生違限者充吏永樂元年二月初設北京國子監吏部奏言天下教官闕訓導二千餘員欲取通經監生三百名送翰林院考用從之八月命內府辦事監生一年許就選三年諭禮部曰學校育才以資任

用太祖高皇帝內設國子監外設府州縣學選用師
範教育俊秀嚴立教法豐廩蠲徭期待甚至爾部宜
申明舊規俾師教無關士學有成庶幾國家得賢才
之用遂頒學規榜例于國子監及府州縣學一如洪
武舊制五年命禮部選監生三十八人隸翰林院習
譯書准出身是年初令監生往龍山廠清查營木植
謂之辦事凡二年得銓用八年令歷事監生有三次
考俱平常者于未入流首領官敘用九年令所撥監
生必循資次毋得坐名選取著為令二十二年中軍
都督府奏本府歷事監生七人吏事勤慎請送吏部
授官仁宗曰為士豈止習吏事而已誠能通今博古
達于修己治人之道吏事何難自今監生歷事考稱
者仍令還監進學俾由科舉以進于是通政司引奏
六科辦事監生二十人滿日例應還監仍願就科辦
事以圖報効時六科給事中缺諸生方有希覲仁宗
欲抑之故有是命宣德元年命歷事不中者仍歷事
餘皆復監讀書再考不中乃充吏以天下教官關命
于南京國子監選二百八十人翰林院于承天門試
之四年御史奏言南京國子監生及一二十年未得
進用有負朝廷作養之意請令兩京監生歷事授官

相叅取用從之八年令天下生員年四十五以上者
考選送監十年令監生課業做書按季送翰林院考
校年終奏繳正統二年令副榜舉人不願就教職者入
監卒業三年祭酒陳敬宗言監生所撥歷日已有定
制乃不循次序輒求襍職尤當禁止自今撥歷惟計
坐堂月日英宗是其言命亟行之虛曠有罰自此始
四年令官生告入監者務須科舉出身五年奏准三
法司寫本分巡一年出身者于應歷事監生內取用
兵部戶部清軍寫誥天財庫辦事三年出身者于入
監五年內取用印綬清黃續黃三年仍歷事二年共
五年出身者于入監三年內取用六年祭酒李時勉
奏請監生省祭丁憂月日不准作坐堂以革宿弊七
年命入監十年以上者准照歷事例出身又命省祭
丁憂一二次已復監者准作坐堂月日景泰元年以
邊圉事殷令天下納粟納馬者許入監讀書限千人
而止至四年七月始罷不行開例納監自此始嗣後
賑饑及接濟大工援此例無止輟之期矣四年令監
生坐堂五年者辦事歷事二年出身坐四年者辦事
歷事三年出身坐三年者辦事歷事四年出身二年
一年者止令辦事不許歷事出身又令監生正歷一

年三閱月寫本一年長差三年天順元年詔在京三品以上官子孫願入監讀書者務令科目出身英宗曰國學乃育才之地今後不許濫進自是非三品子孫不得乞恩遂為令二年令監生清黃以三年為限送部選用八年令正歷六月寫本八月長差一年有半成化元年令生員納糧納草納馬俱許入監尋令凡納粟等次監生坐堂十年循次撥歷若中鄉試者通計先年坐監月日為期二年南京議賑饑欲令官員軍民子弟納粟送監禮部尚書姚夔奏言國子監育才之地朝廷資以致治近各處起送納草納馬生員動以萬計已不勝其濫今又行此將使天下以貨為賢士風日趨于陋尚望其有資治理哉憲宗曰禮部議是其勿許三年令在京三品以上官子孫許一人送監照例出身四年令天下歲貢生提學官考一等者方許科舉監生願就學職仍嚴試三場始准其納馬納草等項進身及經科舉監生與年五十以上者不得濫與五年令歷事監生依天順六年例歷事三月考勤後仍歷九月共滿一年寫本者亦以一年為滿其清軍寫誥及天財庫書辦等俱與歷事監生相等分撥又令依親監生例應原學肄業者提學官

嚴加約束違者治之十一年南京祭酒王與令丁憂服滿復班者每坐堂三日加一日謂之加丁已遂引為例十九年監生坐班者少奏請行文原籍有司造冊開報待朝覲之時齋赴禮部發監查照後為例二十年以山西陝西大饑開納粟入監之例又詔生員納粟備邊者許入監有願坐監者令其自備柴米寄監讀書二十一年令納米者仍照復監事例關支月糧其年十七以下者備行原籍本學肄業嚴加作養考核仍以入監日為始扣滿十年方許起送復監又吏禮二部會議科貢入監乃祖宗舊制納粟則一時權宜若循次撥歷滿日入選則納粟者比之科貢數有不均宜相兼撥歷二十二年請臨撥復扣筭兩途人數多寡以三七分為率或四六均平撥歷從之二十三年令北方科貢納粟監生告入南監者聽弘治四年祭酒謝鐸言監生納粟止及一分科貢已有二分乞轉科貢為六七更納粟為三四依議行之十年令監生依親水程不筭實坐止循食糧月日淺深撥歷十三年令監生內府雜差准歷事一年滿日上選十四年令六科辦事照歷事一年上選八月南京九卿奏言南監坐班見有一千四百餘名差撥有限比

之北監誠為淹滯乞為疏通漸減歷事年月少紓士
困又在京辦事監生及六科短差亦照內府事例以
一年為滿准作正歷附選自今乞照前例附選從之
時國子監科貢納粟事例相兼流品混雜然規條尚
嚴凡省親畢婚不得踰限而雲南四川土官生歲給
衣廩尚如初制正德四年開納粟實邊入監讀書之
例五年禮部言在監人數已多而倉糧甚少欲得疏
通人材節減廩餼因令正歷者遞減月數已俱照舊
八月以人材壅塞令放回依親者歲貢一年援例五
年方許行取復監九月復停放回依親之令八年令
南京以文書至日凡未經歷滿起送者正歷并寫本
雜歷各一年長差二年俱滿日撥發更替又令南京
正歷暫添二名雜歷暫添一名照例考勤及歷滿上
選待後納銀監生將次撥歷之日仍復舊規十三年
再開上粟入監之例以備賑濟十六年肅皇帝即位
四月始嚴其禁嘉靖元年令公侯伯未經任事三十
以下者送監讀書六年令已任者亦送監授以大學
語孟諸書八年奏准諸司歷事監生不得引病回籍
十五年令南北直隸浙江諸省告回舉人限期赴監
肄業違至半年者作曠援例生員向有依親給假在

家者亦限三月取回又令納例監生私歸二月以上者發回原學十九年令私歸半年以上者黜為民二十四年令諸司歷事監生講習律令隆慶五年以監生數多歷缺命三名增一暫減歷期正歷九月為滿萬曆元年嚴監生替代之禁五年令凡納粟諸色監生循例坐堂十年挨次撥歷若鄉試者通計先年坐監月日撥歷其未冠願坐監者亦滿十年方作復監之數凡歷事監生吏部四十一名戶部五十三名禮部一十三名大理寺二十八名通政司五名行人司四名五軍都督府五十名謂之正歷三月上選滿日

增減不定又有諸司寫本戶部十名禮部十八名兵部二十名刑部十四名工部八名都察院十四名大理寺四名通政司四名隨御史出巡四十二名謂之雜歷一年滿日上選又有諸色辦事清黃一百名寫誥四十名續黃五十名清軍四十名天財庫十名初皆三年謂之長差後准一年上選承運庫十五名司禮監六十名尚寶司六名六科四十名初作短差後亦准一年上選又有隨御史刷卷一百七十八名工部清匠六十名俱以事完日上選此外又有禮部寫民情條例七十二名光祿寺刷卷四名修齋八名叅表

二十名報訃二十名齋捧十二名錦衣衛四名兵部
查馬冊三十名工部大木廠二十名後府磨筭十名
御馬監四名天財庫四名正陽門四名崇文宣武朝
陽東直俱三名阜成西直安定德勝俱二名以半年
滿日回監十六年南京祭酒趙用賢條上七事內一
復勲胄入監之制請命公侯駙馬伯子孫非從成均
教習者不准承襲一嚴監生久曠之罰歲久不復班
者竟黜即舉貢不少借一禁在監加納之例一復監
試防檢之役二十四年命禮部將勲爵應襲者送監
讀書三十年部議過湖刷卷之差俱以一月為期將
諸生篤學有行誼者充之次則年月深者充之每堂
令公舉一人為會長專以行業相規其已成材未成
材者以壓撥免撥為勸懲三十四年申飭監規有三
一敘撥之規必日月既滿方與撥歷未及期者一日
不容假借一假曠之規監生逃回者該監呈部行提
三月不到除名一叅處之規凡經該監處分者不許
夤緣倖進如從別衙門送監者徑自駁回仍行重治
四十三年令在京告納監生先取同鄉印給暫送入
監必原籍查回乃准實歷天啟時國學寢廢三年御
史奏言為陛下教養人才外則提學內則祭酒司業

在文字考課之間尚存木鐸聾瞽之意今國學廢弛已極博士諸賢倚席不講切有世道之憂下部議行七年令廩例納監仍行文原籍查確方准實歷崇禎二年御史吳牲疏言帝王之治首崇教化太祖首建國學令生員入監肄業以三等定高下其後陳敬宗李時勉為南北祭酒秩宗之政肅于朝廷而得士最多自納粟之例開于景泰之後而作養之意衰不復知有人材矣今監生年資深者反不如効勞吏胥輩朝輸白鏹夕挂青袍亦庠序之羞也願勅祭酒司業加意作養一遵課試之法以次而升有文行最優者咨送出身而博士以下擇而用之俊乂或可興也是年司業倪嘉善請行積分法從之積分以月課為準而叅以季試及科考復命祭酒顧錫疇等于十月初四日舉行監試每堂拔一人進呈以陶汝鼎等六人註官改資八年祭酒元璐疏言世胄入監自襄城李國禎而外無一人至者乞通查送監一體教習又天啟年間事例盛行有假印假文冒騙以去者又有得部移文並不投監伺會取撥者今于一收一撥之間設法關通凡禮部咨送編例字為號本監每月終將收到監生彙冊報部凡本監咨撥編歷字為號吏部

亦于每月終將撥到監生彙冊報監俱以崇禎八年九月為始又教學八議請以貢選為正流撥納為閏流貢選不限撥期以積分數滿為率撥納則依原定撥限為率如撥納中有英奇之士同貢選一體教習又請歷事無分正雜名色凡當咨撥一照舊規各該衙門以次分派惟以本監考定等第為歷期多寡各衙門收到監生務查有無替冒因而教之政事一切謄寫猥差悉與革免滿日考其勤惰開報吏部不率者發回本監再行教習從之十三年祭酒李建泰重定監生則例一舊例每月作課六道今擬以二課試經

書義二課分試曹務二課試騎射一每月朔望齊集諸生六曹官分講六曹則例博士官講孝經小學或五經一章一本監各正官俱置立勘合文簿令每人先誦習二則必二則精通方許改習能條答精核文理俱優者于本名下填註印鈐歲總錄二則以上者分別咨送仍聽部試鈐註通四則或六則以上者請親試錄用或量遵祖制以示優異詔皆允行顧太學之紊亂也久矣當景泰時始開事例多不踰千人論者猶交章以停罷其後歲屢行而人以為固然無訾議之者矣且先以例猶嚴試之而慎所與其後匪直

可否不為較益乃翫曲以從之以半分一分七分八分之積數為二十四月十二月八月六月之撥期而所謂撥歷者則又開贖歷之例正歷者假之以求替襍歷者責之以輸直此積分之廢也二百年至于崇禎雖稍復其故卒無成效嗟夫

明史卷七十五

志四十九

選舉五

學校下

武學附

學校自漢武時始興太學唐始立郡縣學宋始置諸路州學官代有增設而法未之具也迄明天下府州縣及衛所皆建儒學所設教官至四千三百餘員其弟子員官廩之擇其尤者入太學所以教養綦備矣其後承平日久而生徒既廣文教益張舉天下高爵顯秩出于其途而農工商賈不敢與士為敵體雖邊陲海澨之地皆知誦習詩書為可貴此二百年來敦崇學校獎厲師儒之所致也洪武二年太祖諭中書

省曰元人禮教銷亡上下波靡學校之設名存實亡
兵變以來習于戰鬪惟知干戈莫識俎豆朕謂教化
之道學校為本宜令郡縣皆立學宮延師儒教授生
徒以講論聖道使人日漸月化以復先王之舊于是
天下郡縣並建學府學生員四十人州學生員三十
人縣學生員二十人缺聽于民間選補免其徭丁生
員令專治一經以禮樂射御書數設科分教三年置
應天府儒學生員六十人入學校射儀六年令生員
一應文字皆用散文不許為四六誤後學十五年八
月命禮部頒禁例于天下學校勒卧碑置明倫堂之
左永為遵守一曰府州縣生員若有大事干己家者
始許父兄弟姪具狀入官解訴二曰父母欲行非必
懇告再三使不陷危亡三曰軍民一切利病不許生
員建言四曰生員有學優才瞻深明治體年三十願
出仕者許述作文詞由教官考校具呈正官親齎奏
聞五曰為學必尊敬其師凡講說必誠心聽受毋恃
己長妄為辨難六曰為師者當體先賢竭忠教訓以
導愚蒙七曰提調正官嘗加考校獎其勤敏斥其頑
惰八曰在野賢人果能練達治體敷陳治道許赴所
司告結文引奏聞九曰凡冤抑等事許將實情自下而

上陳告不許越訴十曰江西兩浙江東多有代人訴
狀者今後治以重罪十一曰各處斷發充軍及安置
人數不許建言十二曰若十惡之事有干朝政實跡
可驗者許密切赴京面奏十七年十一月命遼東立
學校二十年太祖以北方學校無明師生徒廢學命
吏部選南方學官有學行者教之二十年令增廣生
員不拘額數二十四年令有司官朔望詣學謁廟升
明倫堂教官侍坐生員東西序立講書又令生員讀
大誥律令歲貢時試之二十五年定禮射書數之法
一朝廷頒行經史律誥禮儀等書生員務熟讀精通
以備科貢考試一朔望習射于射圃樹鵠置射位初
三十步加至九十步每耦二人各挾四矢以次相繼
長官主射中的飲三爵中采二爵一習書依名人法
帖日五百字以上一習數務精通九章之法是年起
取富民原係生員者送應天府學二十六年定學官
考課法以九年任內為率縣學生員二十名有舉人
四名又考通經教諭為稱職陞用通經二名為平常
本等用州學生員三十名有舉人六名又考通經學
正陞用通經三名本等用府學生員四十名有舉人
九名又考通經教授陞用通經四名本等用不及名

又不通經皆黜降別用訓導分教生員不分州縣學
舉人三名又考通經陞用不及數者雖通經本等用
無舉人又不通經退別用先是教官考滿兼覈其歲
貢生員之數至是以歲貢為學校制故專于科舉為
殿最二十七年令武官軍餘年十五以下許入府州
縣學讀書又令生員入學十年之上學無成效送部
充吏其有成效及十年以下依入學年月編次造冊
解部以備取用生員有託故偽訟革罷不應選者追
廩饒還官本生送部充吏二十九年令凡生員經斷
罷間者皆充吏不追糧其無大過犯者免充吏永樂
二年令增廣生員入學十年令年二十之上魯鈍不
能行文者充吏三年申明師生陞堂肄業之禁是年
令起取人匠內有生員照例送應天府學宣德三年
定增廣生員在京府學六十人在外府學四十人州
學三十人縣學二十人照例優免差徭令巡按御史
會布按二司及提調教官考試生員廩饒十年之上
學無成效者充吏六年以下鄙猥無學者追廩為民
七年令衛所官舍軍餘俊秀者許入附近府州縣學
聽本處鄉試正統元年奏准各處添設按察司副使
或僉事一員南北直隸監察御史各一員專一提督

學政令生員名缺許本處官員軍民之家及社學俊
秀無過犯子弟選補又令廩饒六年以上不諳文理
者充吏增廣六年以上不諳文理者為民六年令提
調官置簿立籤稽生員所業提學官察提調勤怠書
其稱否生員有藐視師長齟齬教法者斥之十年奏
准提學官會布政司堂上官一員兩直隸會巡按御
史公同提調官考選生員年四十以上不諳文理者
充吏雲南貴州免考尋又令提學官遍詣所屬學校
提督生徒嚴加考試有不職者禮部都察院堂上官
奏黜十四年令生員有犯該充吏者廩米免追若犯
受贓姦盜冒籍宿娼居喪娶妻妾事理重者兩直隸
發充國子監膳夫各布政司充附近儒學膳夫齋夫
滿日為民仍追廩米景泰元年罷提學官聽巡按御
史各司府州縣官提督考察又令按察司分巡各道
副使僉事做提學官勅書事理提督兩直隸御史提督
二年令雲南貴州軍民生相兼考補廩膳照例科貢
三年令各處軍生例同天順五年令各處會官考選
廩饒未及六年考不中者追廩為民六年復設提督
學校官各賜勅諭一體行聖賢言語不許徒務口耳
之學一為學必主敬窮理毋得鹵莽間斷一四書經

義策論務典實平順說理詳明習字亦須端楷一教官須察其德行考其文學學問疎淺及怠于訓誨者送吏部別用其有不肖實跡者即送按察司直隸送巡按御史問理一師生每日坐齋讀書及日逐會饌有司僉與齋夫膳夫一生員不諳文理者廩餼十年以上發附近處充吏六年以上者發本處充吏增廣十年以上發本處充吏六年以上黜為民一生員本身外優免二丁差徭一凡巡視學校乘驛舟官馬仍帶書吏一名隨行走給一府州縣提調官嚴束生徒不許游蕩為非凡學內殿堂齋房損壞即量工修理一所過之處遇有軍民利病及官吏貪酷事干奏請者從實奏聞一本職專督學校不理刑名如有所受詞狀輕發所在有司重送按察司直隸送巡按御史提問一生員詐冒鄉貫隱蔽過惡應試者聽本職及提調監試官拿問一布按司官及巡按御史不許侵越提督職事若提督官行止不端許巡按御史奏聞一所轄境內遇有衛所學校一體提調整理武職子弟令習武經七書百將傳其中有能習舉業者亦聽鄉試一歲貢生員將食糧年深者考送一廩餼缺于增廣內選補增廣缺于本處選子弟補充若有額外

之數須嚴加考選存留待缺一令有司每鄉俱設社學擇師以教子弟勤効仍免差徭一師生于學校事務並遵洪武時卧碑不許故違是年令生員爭貢及越訴者充吏成化三年令提學官躬歷各學督率教官化導諸生仍置簿考驗其德行文藝治事俱優者列上等不及者次之仍以德行為主歲課月考循序而上非上等不得充貢又令衛學四衛以上軍生八十人三衛以上軍生六十人二衛一衛軍生四十人不及者不拘有司儒學軍生二十人十七年令土官嫡子許入附近儒學弘治十六年題准生員有傲慢師長挾制官府及敗倫結黨者教官具呈該管官究治正德九年令北直隸考退生員免追廩米十年准都司衛所學原定一年一貢者與設優等次等生員各四十名原定三年二貢者與設優次等各三十名二年一貢者與設優次等各二十名通行提學官考補以後于優等內照例選貢餘作附學又令口外衛學並各都司衛所土官學離布政司寫遠提督官不能歲歷者許各道分巡官歲加考校行提學官知會是年給各按察司提督學校關防十六年令土官子孫送順天府食廩者不許再補嘉靖二年令增順天府

廩饩生員二十名三年增應天府學廩饩增廣生員
順天府學增廣生員各二十名六年題淮南直隸廬
鳳淮揚四府滁徐和三州學校以江北巡按兼之湖
廣衡永二府郴州以上湖南道副使兼之辰州一府
靖州以辰沅道副使兼之廣東瓊州府以海南道副
使兼之各請專勅行事每歲巡歷考校十年題准生
員內有刁潑之徒恣意非為及被黜妄行奏擾者不
准仍拿問十一年奏准承天府學廩饩增廣生員六
十名其鍾祥縣學生亦照例隸府學十五年詔廩饩
生員願告侍親者聽之其累試不第年五十以上願
告退閒者給與冠帶仍復其身十六年令大同所屬
府州縣衛所儒學生員俱令冀北道分巡官代理二
十一年直隸金山衛學照福建平海衛學例添設廩
饩生員二十名貴州普定十二衛各設廩饩十二名
二十六年令甘肅各衛所儒學生員行甘肅巡按御
史兼管提調科舉年考送陝西應試是年令歸順土
官子孫照舊送學食廩萬曆三年給提學官勅諭十
八條其別立書院聚黨空譚及剽竊異端炫竒立異
者更加嚴飭餘與天順六年所給例同童生擇三場
俱通者始收入學大府不過二十人大州縣不過十

五人鄉試生儒每舉人一名取科舉三十名兩京監生亦依解額照數起送浮者監試官徑行裁革時承平日久學政靡濫輔臣張居正核戒各州縣入學之數提學官奉行太過至有一縣僅錄一人者十一年令考取生員毋失原額科考與歲考例同總計三年之內大府務足六十人大州縣務足四十五人或科目數多就試人衆于定額外量加數名但不許倍于原數是年令南直隸提學御史仍兼管江北其湖廣貴州提學官照舊專管惟瓊州府仍屬海南道十三年許揚州商竈子弟于運司應試提學官一體入學十五年禮部奏言唐初尚靡麗而士趨浮薄宋初尚鈎棘而人習險譎文章之關世教如此今其初舉業有用六經語者其後引用左傳國語矣又數年引用史記漢書矣史記窮而用六子六子窮而用百家甚至佛經道藏摘而用之流弊極矣弘治正德嘉靖初年中式文字純正典雅宜選其尤者刊布學宮俾知趨嚮因取中式文字一百十餘篇奏請刊布以為準則又奏言教士之法莫親師儒宜慎其選除優其遷轉使科目出身者不薄此不為貢途出身者不畫地自限然後師道重而教可成至撫按論劾有司輒擬

改教是重民輕士宜禁勿行從之二十四年嚴文體
詭異之禁命提學官務查有無轉移士習為殿最不
許槩擬陞轉二十六年令陝西苑馬寺七監生員于
州縣類考三十三年禮部奏言提學官三年之內有
歲考科考自歲考稀少生員有終身不見提學而混
廁衣巾濫沾優免者及至大比又有類考之規如府
學則府考送道縣學則縣考送府府考送道不求不
得士風日壞宜令歲考通學盡考提學未經歲考不
得陞遷有仍類考圖便徇私者劣處奉旨嚴行三十
三年令思明府建立學校設教授一員量設廩生六
員其寄附太平府者悉歸本學三十七年禁立吏生
樂生歌生等名色四十一年增設南直隸湖廣提學
各一員四十二年禮部會議士風日頹當嚴加約束
事權雖在督學而申報則屬有司自後通行府州縣
衛各置三等號簿有生員出入者逐時登報若有結
黨者將倡首黜革毋因勢豪姑為縱釋從之四十三
年禮部又言為今士風計莫若申嚴歲考之令盡革
類考之名其申嚴有三一解卷不得另騰一歲考各
項一併開冊解部一陞轉必俟歲考事完報部查議
至歲考條教一曰三等之簿當稽一曰冒濫之員宜

華一曰保留之陋規宜除詔令各提學官實行崇禎六年傳諭童子必入小學遇試先察德行考官核論宜有規條頒布遵守又教官為士子師長近以衰庸充數教術全廢須設法興起于時禮部奏言取士固先德行而尤貴豫養今士習久錮合勅各直省學臣刊為條教頒下府縣教官能表率子衿俾飭躬勵行註以上考其生童入試州縣教官各取無過犯保結有敗倫而失檢舉者有罰至提學一道必于文字外加意作興諸生行誼著聞文雖平加以優等素行薄劣文雖工黜革示懲實能奉行勅書者查覆紀錄如彰瘕不明勸懲無法提學官有罰詔悉從之七年又諭禮部直省提學官係教育人才根本着查小學曾否實心興舉德行作何獎勸奔競囂凌浮詭之習果否禁飭每次考案有無溢額徇情并將所解試卷嚴加磨勘文體果否純雅切實解卷有無改謄欺飾逐一具奏分別勸懲時申飭屢屢特以兵餉不敷大開納例十年戶部疏請考試納粟若責以文理非作興之道合比往例倍加優厚考試如果不通諸生原有寬限六年之例合為再展六年以勵進取其通者一體幫補督學不得有意分別時士風囂競雖嚴加砥

礪懼其弗戢顧導之以利復寬假之于是資流雜而防檢廢十一年以士習大壞更加嚴飭將勅諭條款刊布省直各府州縣頒示各學究無實効學政自此不可為矣按明初倣古里塾黨庠州序之制薄海內外胥建之學故自衛學及軍舍土官皆得以子弟隸學校之中至于宗學其師于各王府長史紀善伴讀教授等官擇學行優長者除授其子弟令世子衆子長子將軍中尉等年未弱冠者並列焉正德十四年俾嚴立課程教如法萬曆十年定宗室之子十歲以上俱入宗學若宗生衆多分置教師或于宗室中推舉一人為宗正領其事令各生誦習皇明祖訓孝順事實為善陰隲諸書其四書五經史鑑性理相兼誦讀十八年復議于宗室中推舉宗正一人宗副二人令子弟入學讀書每歲就提學官考試三十二年令宗藩子弟入學者衣冠一如生員又令楚藩比周藩例舉行宗學三十三年詔宗學一體鄉試中式其後宗學寢多子弟輒有致身科目者若社學明初為特重洪武八年十六年累詔有司立社學延師儒以教民間子弟二十年令民間子弟讀御製大誥兼讀律令正統元年令各處提學官及有司州縣官嚴督社

學不許廢弛有向學者許補儒學生員弘治十七年
令各府州縣建立社學訪保明師民間幼童年十五
以下者送入讀書講習冠婚喪祭之禮而其法久廢
所在有司莫為舉之崇禎六年命塾師籍名于官有
能以孝經小學教育童蒙俾入孝出弟塾師榮以衣
巾其子弟敗類不戒塾師有罰此社學遺規然奉行
者尠卒于造士之方具文亡實耳

明武學以教習勲衛幼官子弟始洪武二十年禮部
奏請立武學用武舉建武成王廟太祖曰是岐文武
為二途矣三代以上文武兼脩故用無不宜以太公
之鷹揚而授冊書仲山甫之賦政而式古訓召虎之
經營而矢文德豈比于後世武學拘于一藝之偏陋
哉今欲循舊用武舉建廟學甚無謂其已之令天下
軍衛子弟隸學以教其勲戚貴胄亦肄業于國子監
建文四年始設京衛武學永樂九年太宗慮武臣子
孫不諳禮義諭兵部申明武學舊規正統六年成國
公朱勇奏准選驍勇都指揮等官五十一員熟嫻騎射
幼官一百員始命兩京建武學以訓誨之九年命各
都司衛所凡武職應襲子弟年十歲以上者俱聽提
學官選送武學讀書無武學者送衛學并附近儒學與

生員一體提督成化五年掌京衛武學奏言三事一本學餘堂數楹乞勅所司改為文廟一本學應襲子弟乞試藝量陞一武生乞勅所司每歲終考試入學十年以上學無或取者追廩還官送營搃練詔下所司弘治六年從兵部尚書馬文升言刊武經七書分散兩京武學并各處應襲舍人嘉靖十五年兵部言武學在京城東偏較閱弗稱請以皇城西隅廢寺稍加拓飭改創齋舍移武學于此俾大小武官子弟及勲爵新襲者肄業其中用文武重臣教習從之萬曆十一年兵部條陳武學事宜一定考驗言每年雙月本部會同戎政勲臣督率司屬考驗一次歲終本部堂上總政戎協會閱一次以定收黜一復專官言向來武庫司專設主事一員管理武學近裁去請照舊專設一重教職言會典開載教官每日升堂都指揮見授三品并執弟子禮請申嚴典例立為程式詔皆如議崇禎十年令天下府州縣學皆設武學生員提學官一體考取十三年諭歷年會典事例專設武學教習勲衛幼官子弟或演習弓馬或考驗策文擇地會官必以時肄而又簿記功能有不次擢用黜退送操獎罰而激厲之文于武學外仍聽訪保以充教習

乃年來較課多踈勸懲罕飭應照會典武學條款見行者作何振率久弛者作何興釐其直省都司衛所凡武職官下子男應襲并其餘弟姪年十歲以上者俱聽提調官選送武學讀書無武學者送衛學并州縣儒學與生員一體提督仍遵欽定學規作養訓誨十五十六年歲加申飭而蠹壞相沿卒亦莫之少振也

明史卷七十六

志五十

選舉六

薦舉

保舉附

明初太祖所用士率由薦舉下金陵辟儒士范祖幹葉儀堯婺州召儒士許元胡翰等日講經史治道克處州徵耆儒宋濂劉基章溢葉琛至建康命有司創禮賢館以處之未幾以濂為江南等處儒學提舉以溢琛並為營田僉事基留惟陸預謀議甲辰三月勅中書省曰今土宇日廣文武並用卓犖竒偉之才世豈無之自今有能上書陳言敷宣治道武畧出群者叅軍及都督府具以名聞或不能文章而識見可取

許詣闕面陳其郡縣官年五十以上者雖練達政事而精力既衰宜令有司選民間俊秀年二十五以上資性明敏有學識才幹者辟赴中書與年老叅用之十年之後老者休致而少者已熟于事則人才不乏而官使得人其下有司宣布此意洪武元年徵王禕為省掾遣詹同魏觀吳輔等分行天下訪求賢才三年詔天下推訪賢才以禮遣之四年召永豐劉于至于以年老辭職尋賜還山六年命吏部訪求賢才于天下諭之曰世有賢才國之寶也若高宗之于傳說文王之于呂尚豈智之不足而皇皇于版築鼓刀之

徒蓋人君之能致治以其有賢人而為之輔也今山林之士豈無德行文藝可稱者宜令有司采舉備禮遣送至京朕將任用以圖至治是年罷科目專用薦舉其目有經明行修有懷才抱德有賢良方正有人材有孝廉自鄉黨引薦于朝而各省貢士皆卒業太學以次除用蓋罷進士之科者十有餘年而薦舉至極重矣時以初行辟薦其法甚嚴每舉者至京親校閱不稱則罪其舉主七年宋濂薦會稽郭傳曰雖寄跡釋氏竒才也擢為翰林院應奉十年勅諭溫州府訪求師儒十二年詔徵天下博學老成之士先是謂

禮部曰朕自臨御以來十有二年思得賢士以熙朕
績然博學老成之士匿德藏光不肯輕出宜下有司
悉心推訪禮送于朝至是皆送京師吏部奏除官二
千九百八人天下所舉儒士人才五百五十三人十
三年詔舉聰明正直孝弟力田賢良方正文學術數
之士勅吏部曰比遣使徧諭有司各舉才能以備任
使而有司不體朕意往往以庸才克貢已勅所司按
之以法爾吏部宜申諭有司用心咨訪務得真才是
年舉至京者八百六十餘人復遣使召儒士張叔廉
陳貞宋納教諭石璞楊盤訓導曹文壽張玳李睿用

四輔官王本等薦也十四年勅令內外倉庫司局官
各舉賢良方正文學才幹之士一人命郡縣求明經
老成儒士為儒學訓導十五年命天下朝覲官各舉
所知一人九月吏部以經明行修之士鄭韜等三千
七百餘人入見諭之曰卿等固皆賢人君子然山林
之士豈無如卿者其悉舉以為朕用于是單縣儒士
張寧以董倫等薦復遣使聘之耆儒鮑恂余詮全思
誠張長年徵至京年皆九十餘賜坐顧問命為文華
殿大學士恂等固辭乃賜勅遣還時孝廉人材及郡
縣學所貢士若富戶耆民皆得進見見稱旨擢不次

十七年行科舉法仍令秀才人材必由鄉舉里選州縣官會同境內耆宿訪求德行材藝著于州里之人先從隣里保結有司驗其言貌書判方許進呈蓋其時薦舉猶與科目並行也是年徵金華處士陳遇及新喻梁寅十八年詔舉孝廉十九年詔舉經明行修練達時務之士年七十以上者郡縣禮送京師諭禮部曰古之老者雖不任以政至于諮詢謀猷則老者閱歷多而見聞廣達于事情周于物理有可資者文王用呂尚而興穆公不聽蹇叔而敗伏生雖老猶足傳經豈可槩以耄而棄之若年六十以上七十以下者當置翰林以備顧問四十以上六十以下者則于六部及布按二司用之二十三年選天下才智耆民可用者得一千九百十六人二十五年復徵方孝孺至曰今非用此人時除漢中府教授時以薦舉即顯擢者如王本社數趙民望吳源以儒士為四輔官兼太子賓客位尚書上賢良郭允道秀才范敏曾泰為戶部尚書稅戶人材義門鄭沂為禮部尚書儒士趙翥為工部尚書張子源試禮部右侍郎張宗德試兵部右侍郎他若耆儒劉埶關賢為左右副都御史明經張文通阮仲志試左右僉都御史人才赫從道試

大理寺右少卿孝廉李德為南京應天府府尹儒士
吳顯為國子監祭酒皆以薦舉立登顯要至如鄒伯
源等十一人蕭禮敬等二十五人俱為叅政叅議朱
源等二十一人俱為副使僉事餘不可勝紀其以下
僚馴至公卿者又比比已二十六年定州縣官每歲
于所轄境內選端謹人材一人送布政司考覈轉行
按察司覆考送部其賢良方正及山林巖穴隱逸之
士量才定其高下與儒士秀才孝廉試其通經與否
不拘名數送部或內外官員薦舉人材即行移原籍
官司起取是年詔徵浦江鄭王子弟年三十以上者

三十一年建文即位徵江西處士楊士竒克實錄總
裁官十二月令內外群臣各舉山林巖穴懷才抱德
之士又詔舉優通文學之士以處士唐愚士為翰林
侍讀永樂元年勅內外諸司文職官各舉所知或堪
重任而沉滯下僚或可剗繁而優游散地或抱道懷
才隱居田里無問遠近並舉以聞時以人才馬麟盛
儀俞景周周克敬孫裕江潤艾英為布政使吳衡等
六人為叅政叅議而布衣陳濟與學士解縉同為太
祖實錄總裁官蓋其時用人猶循太祖舊制不拘資
格故也三年召西安儒士馬巨江四年召北京儒士

武周文俱命為翰林官以年老致仕五年勅張輔沐
晟劉儁訪求交趾人才以甘潤祖等十人為諒江等
府同知洪熙元年詔民間有行己廉正才堪撫字者
許見任官舉薦宣德元年吏部言稅戶人材多言老
病請以子姪代者命考驗用之七年詔所在有司舉
文學才行出衆之士年二十以上者八年詔天下布
按二司及州縣官各舉賢良方正一人送吏部擢用
正統十四年詔所舉儒士如永樂間故事送翰林院
試之不中者罷為民景泰三年詔舉文學才行隱于
民間者赴京考用天順元年詔處士中有學貫天人
才堪經濟高蹈不求聞達者所司具實奏聞是年遣
行人聘處士吳與弼二年命為左諭德弼固辭賜勅
褒賚仍遣行人送歸成化十九年召廣東舉人陳獻
章授翰林院檢討賜歸二十年徵處士胡居仁尋卒
弘治六年處州潘辰以薦授翰林院待詔歷官太常
寺少卿嘉靖二年巡撫薦生員文徵明八年輔臣薦
儒士葉幼學皆循潘辰例授以待詔官隆慶二年祭
酒姜寶請于舉人中有孝友嫻睦名實相孚者許巡
撫布按官會薦補國子監學正等官而其時薦舉之
法寢衰且廢矣蓋明初以科目薦舉歲貢為三途自

科目行資格日已重而薦舉一途不復行弘治以還凡詔旨所載徵聘隱逸率為具衣草野亦無應之者即間一舉行大抵以閒官散秩相委置所謂殊恩異數如昔之陳遇武周文吳與弼者不可復覩已萬曆二十六年科臣奏言國家用人所關甚重今宜及時推擇或拔自田間或簡在庶位務使仁賢布滿宇內神宗是之顧其後江西巡按奏薦隱士章潢四川巡按薦舉人楊師心湖廣撫按薦舉人瞿九思亦祇下所司授以訓導待詔而已崇禎八年諭吏部曰近來吏治貪殘皆由銓選推陞但循資俸考祖宗朝保舉

之法實可遵行自今兩京文職四品以上在外三品以上各舉堪任知府者一人兩京文職并在外五品以上及翰林科道官各舉堪任知州知縣者一人所舉不拘進士舉貢監吏士民出身但有賢能廉幹即將顯著實績開列送部量才除授九年吏部復議舉孝廉之說祖宗朝皆偶一行之未有定制比保舉之令既斟酌徃法見之施行今宜通行各直省巡按御史轉行府州縣加意物色果有孝廉懷才抱德經明行修之士勘結得實由司道以逮巡按覆核疏聞驗試錄用于時薦舉紛紛遍天下然皆授以殘破郡縣卒

亦畧無裨効而且疏論其貪猥不法以保舉為護身之符者十五年詔求將材尤急頗難其人至十七年諭以豫楚郡縣除調難循常格今即行各撫按官凡被陷州縣員缺悉聽辟選更置不拘科目襍流入等但才能濟變品足服人者即與填用時方岌岌固不憚號咷以求賢然已大亂無及矣大抵明初重薦舉人才而自洪武以降尤重舉官之法太祖初令在外官員有政績者許巡按等官奏舉薦舉雖行不甚專屬也至建文即位始定保舉連坐法永樂元年吏部尚書蹇義疏請在內文職七品以上及縣正官各舉所知一人吏部考驗如果賢能量才擢用其所保非人或授職之後闖茸貪污舉主連坐命速行之二十二年諭吏部令在京七品在外五品以上文官並知縣于見任官及軍民中訪舉人才量材擢用洪熙元年令在京在外官各薦所知都御史劉觀等舉才能之士十餘人宣宗諭曰古者除官署舉主姓名貪污連坐今當循此法宣德二年令吏部薦舉人才考試用之四年兵部尚書張本奏舉前刑部員外徐埒職方司辦事人材陳政乞授本部屬官宣宗謂吏部曰張本廉謹其從之他有舉者必會官考試後授以

職五年謂學士楊溥等曰近代有罪舉主之法而全才甚少一言薦之豈能保其終身大抵欲得賢才當厚教養教養有道人自出徒責効于薦舉考課之間蓋求什一于千百也七年詔府州縣官有廉勤公正能恤民者具績奏聞以憑旌擢時以考功員外魏驥為南京太常少卿交趾南靈州黎恬為右諭德建安教諭楊壽夫臨清教諭彭琉為編修蓋京官薦舉不次擢用如此正統元年楊士奇以侍講劉永清才堪繁劇薦為廣東右布政十一月勅吏部在內監察御史尚多缺員今後在京三品以上官各舉一人除

見在縣令不舉外其餘精加體訪具名奏授又以縣令為親民之官令在京四品官及國子監翰林院堂上官各部郎中員外各掌科給事中掌道御史各舉一人吏部體訪除授二年楊士奇等奏言宣德七年以前藩臬二司及府州縣正官惟聽吏部所舉未盡得人自宣宗皇帝勅令大臣保舉得人遂多昔唐太宗命在京三品以上官舉郡守縣令後致天下斗米三錢之効近年京官無人保舉者造為謗語欲隳壞良法伏望仍遵勅行但所舉之人籍記舉主後有犯賊必明正其罪則人知謹畏不敢徇私官必得人矣

詔從其議五年命進士舉人監生吏員官聽諸司保舉十四年令下僚有才能出衆者聽風憲官及上司薦舉景泰初大臣保舉多私所親不得薦者缺望為流言吏部亦以權不盡已出誹之于是御史張子初鍊綱等言御史從大臣保舉則大臣有過必鉗口結舌不敢言有請囓必俯首帖耳不敢異願停之以清弊源下吏部議准悉歸部銓已綱復言吏部選授私舛請復保舉命布政使按察使缺令三品以上保舉餘聽吏部選擢著為令三年詔見任官有才行政事優長屈在下僚及罷職官無贓犯而才學可稱者並

聽在京四品以上在外撫按方面并府州縣正官舉薦赴京考用成化二年令三品以上京官薦舉堪任布按二司官者四年憲宗命今後四品以上官吏部具缺朕自簡除方面倣正統年間保舉六年詔罷會官保舉七年令有司官必待三年政績卓異方許薦舉仍令吏部先察舉主後用其人舉者非人雖有政績必加覆勘二十三年詔天下有司官有才行超卓許六部尚書都察院通政司大理寺堂上官及撫按保舉弘治六年令撫按遇府州縣官才行俱優者不分歲貢吏員一體保舉十一年詔六部都察院堂上

官于兩京科道部屬等衙門有堪任方面知府者各舉一二人十六年令天下撫按及布按二司官訪察所屬賢能以堪任某官具奏擢用正德八年令兩京堂上官五品以上及在外巡撫巡按二司正官各舉堪任守令之人又令三品以上舉堪任知府者十一年令有司歷任二年之上果有政績卓異方許撫按薦舉賊濫連坐嘉靖五年御史請令兩京文職四品以上翰林五品等官各舉所知俟知府有缺陞補仍請籍名禁中視其賢者親擢以鼓舞之十一年題准朝覲之歲備察被責方面有司追究所舉巡按御史四人以上革職閒住二人以上降級調外一人罰俸半年十七年詔撫按官有濫舉市恩及賢否倒置舉劾異同者該科不行糾奏一體治之二十一年令有司升遷任淺及去任久者撫按不得薦舉又令歲終將撫按及別差御史獎詞及諸考語送吏部叅驗或一人自相牴牾或彼此薦劾不同題請勘實罪其誣者四十年令被劾考察聽劾聽調之官撫按不許更行舉劾四十四年令各撫按于所屬中凡有賢能不論舉貢進士一體保舉四十五年議定撫按在地方未及半年丁憂養病者不許一槩舉劾時世宗喜

英察所舉人材不當意舉者輒得罪如御史陳察薦
給事中劉世揚等二十餘人以市恩要譽降海陽教
諭巡按雲貴御史陸夢韓舉原任尚書羅欽順侍郎
鄭岳都御史何塘等謫安慶府推官給事中雒昂薦
羅欽順等坐妄舉奪俸給事中邢如默等薦尚書毛
伯溫等邊才同官劉繪摘叅以為徇私朋比謫如默
徽州府推官是時御史羅廷唯論給事中徐浦議舉
邊才疏曰科臣徐浦意以邊才為急而諸臣所薦乃
有不盡然者甚或鑽刺方行適有以投其機罪過已
深反得以藉其口遷延日久復有以招其來是因明
詔以開倖門所以重為國家用人惜也世宗納其言
下詔切責諸臣濫舉吏部依違之過蓋時雖綜覈名
實而舉劾之際動相牽制流弊所極誠有如廷唯所
云也隆慶元年令天下撫按搜訪境內人才具奏每
復命及年終各行一次又議定兩京九卿科道各舉
堪任督撫兵備及熟知屯鹽者四年南京御史吳時
來疏薦所部有司至五十九人科臣論其濫舉市恩
調外任因定陞遷行取及任淺者毋槩列名薦中六
年吏部言邇來薦舉明例限制甚嚴但前以粵東多
事拊循在良有司今宜于廣東舉劾另行科條如有

彌盜安民循良奏績者毋拘多寡盡登薦剡行取超擢他省不得援以為例從之萬曆九年勅撫按薦舉視本年以前額數毋致徇私偏濫都察院考覈以聞十二年言近來武職冒濫多端今後督撫務從公核實必係將材卓異及年勞堪敘者方許薦列神宗諭令總督撫按訪求異才許于例薦外特舉其各衙門會薦已之十四年兵部尚書郭應聘請特拔廉吏不問品格以歷俸三年為率每歲于十一月內薦舉至部或擢之要職或處之清秩以風有位左都御史辛自修請以後撫按舉薦惟求精當仍遵照萬曆五年之數大省二十人以上中省十五人以上小省十人以上倘遇一時乏賢不必一一取盈詔悉從之是年吏部舉賢能官二十六員命照五年例紀錄擢用二十五年命科道會舉邊才崇禎六年諭以近來士鮮實行人多飾情薦獎尤甚以後部院保舉撫按奏薦俱核實從公不得濫徇欺罔已時屢勅中外保舉邊才迄無實用十六年天下已大亂汲汲需人吏部尚書鄭三俊分罪廢二款通列四十二人以進命覆確另奏然吏部開列率由採訪較之昔年保舉定例則已濫矣况薦舉乎夫天下固未有無弊之法也故有

謂科舉之取士也用而後擇其失也八九薦舉之取士也擇而後用其失也一二而用人之際亦以會舉為至公者顧明初用法嚴峻薦者不敢以私徇人盡兢兢奉職稱任使逮後薄薦舉為具文連坐之法亦不果行而欲一旦破常格發殊恩以廣功名之路適以便私而啟竇耳庸有濟乎蓋事不從本而逐末未有不至極壞者至極壞類不能循虛名以責實効此取人用人所貴慎于初而造就分別之有道也

明史卷七十七

志五十一

選舉七
銓選上

太祖倣古六卿分職以六部總天下大政凡任官之事文歸吏部武歸兵部而吏部職掌尤重始太祖亟于羅致天下士行科目令郡縣歲舉薦入太學人材輻輳京師足任使其奏對稱旨者不次擢吏部惟凜奉上意銓授無成格迨後徵召廢不行異數鮮少官吏皆部選始駸駸有定制洪武元年設吏部尚書等官二十九年定吏部四司曰文選驗封稽勲考功皆系以清吏而文選特掌班秩品命升授注擬敘補之

事選人自進士舉人貢生而外有官生恩生功生監生儒士又有吏員承差知印書算篆書譯字通事諸襍流各釐其品式而進士為之首進士自洪武四年殿試畢授官不等二十一年始著例一甲授翰林官二甲三甲撥各衙門辦事以次除內外官已復有庶吉士之選庶吉士自洪武十八年選入翰林辦事始以後考選無定期俱由內閣送學士等教習業成乃留用洪武中令翰林院考馭諸司奏事永樂初開東閣命解縉等入直典機務遂陞侍讀學士等已用翰林官纂修不皆由進士景泰中陳循等私所舉以襍流

冒進多失人天順二年大學士李賢請專選進士科遂為制自後非進士不得入翰林非翰林不得入內閣南北吏部及禮部非翰林不陞任由是庶吉士人躋顯要其留用者雖科道等不能齊驅矣尚書胡世寧疏言國初翰林多用徵聘之士永樂宣德來如楊士奇張洪由王府審理教授黃淮劉鉉由中書舍人鄒濟陳仲完由教職如此類者初選猶不授其後進士初選即授庶吉士是教競而導驕也故初入仕有夤緣美官之心既得除為持祿養交之計宜復舊制照各衙門選補嘉靖間節奉詔旨內外官有學行純

正堪任宮僚館職者兼推用輒格不行已定閱試法館員倍踰額萬曆三十五年大學士朱賡等請庶吉士每選留九人而趨附者益衆其給事中御史從庶常授者亡幾率取之內外合俸者在內兩京主事中行評博及助教等在外推官知縣等有薦者俸未滿亦同之考選以人缺多寡無定額凡授職皆吏部同都察院注擬給事即實補御史試一年始實授嘉靖三十二年令部屬不許改科道萬曆初停止十五年吏部請以部寺各屬間改除有司陞部屬待科道選從之先是舉人與進士同考嘉靖間令監生得與選已皆罷不行自科道由考選勢日重時之躁競者往往營私躐進職其事者或容長憎愛失其公平選法衰績業以耗廢明末風逾囂左都御史劉宗周疏言考選之役郎署中有自行陳乞者矣推知中有戒俸行取者矣是視臺省為必得之物也賑濟也建城也防河也而戒俸有至三年二年者是以臺省為微勞之勸也祈嚴勅考選必以恬競分別行之懷宗穩其弊每于一奏對定去取卒貿亂鮮實効積漸使然也考選外每年吏部六考六選凡引選六類選六遠方選二單月考序以給選雙月大選以補缺又單月為

急選其改授改降并丁憂候補者次入之惟初授職
及考定陞降者入大選其揀選三歲行舉人乞恩選
歲貢就教選歲無常凡陞職必滿考若員缺應補不
待滿者曰推陞類推上一人單推上二人惟內閣大
學士吏部尚書由特旨間一下廷推侍郎等及祭酒
吏部會同各三品以上廷推太常卿以下部推通叅
以下吏部于弘政門會選詹事由內閣各衙門各掌
印而遷除吏部悉掌之其大臣子姓不令在言路同
屬者則以卑引避仍改授始大學士楊士奇令三品
以上保舉始陞補己李賢言其弊仍歸部未幾霍韜
又言吏部之弊請五品以上皆會推說互異至景泰
後著為令布按缺三品以上會舉餘還吏部大約選
事不得不歸本銓吏部得其人而委任責成固無不
善也弘治中命四品以上官親檢除其權寢下移夤
緣內侍得職者以千計皆不由吏部謂之傳奉官正
德間傳陞益以夥嘉靖中土木禱祀之事作賈衛婪
恣旁午交發此皆叢蠹之尤者其後選舉日益乖往
往緣計簿飾虛文以相謾欺而銓法已極壞在外官
惟總督巡撫屬廷推當洪武時勅遣大臣循行天下
雖有巡撫名無常設迨後始專命巡撫總吏治已添

設總督提督經畧等至推鹽撫民屯田等皆特使所
設尚書輒倍之侍郎至四五人不等並兼都御史便
糾劾邊地兵備等率付勅敘陞仍管事知府及佐貳
亦如之其為有司者薊遼則昌平薊州等山西則大
同河曲代州等陝西則固原靜寧等凡六十有一處
俱為邊缺慎選除立功者越次擢貽悞者罪無赦內
地大率以序遷叅議遞陞叅政至布政僉事遞陞副
使至按察已捷陞不以次又額外多添設崔銑議之
曰官添則缺廣缺廣則易轉倖門一啟居亡固志事
至借限以逃責事成爭知而讓過今守巡之外別立

數銜皆高坐司署止以文移相維屬不亦濶乎抑非
徒冗員也又苦代亟即善政美意誰適為治誠知其
人或先超遷後久任誠善其政或先久任後超遷即
淹序乘除與驟遷適等何必輾轉煩促乎蓋時有一
歲中僉事至叅政四五遷者而京堂亦推恩日較濫
陞例有正陞閏陞並勞陞才望陞挫折陞等支節既
多後先襍沓附私者益以不可校洎其季屢旨察核
卒亦莫之能禁也凡考滿三年給由曰初考六年再
考九年通考綜其稱職平常不職三者奏請黜陟之
大臣封廕出特恩其加銜賜賚有常數餘注冊王官

則否諸部寺所屬皆署職考滿始實予外官率遞考
以待覈襍考或一年或三年或九年郡縣之繁者降
簡一等不稱互調之凡考察京官自弘治時定六年
一察以己亥歲四品以上自陳侯上裁五品以下察
其致仕降調閒住為民者有差冊奏請欽天監御用
監等官則否外官三年一朝觀察從之以辰戌丑未
歲先期撫按總其屬考事狀造冊報目有八而察例
有四與內同凡計處者不敘用大臣不保舉南京例
同諸考課吏部考功司實贊決其振厲百官尚書首
任之而持風憲以激揚清濁都察院為之取宣德時
擢顧佐掌院事勅曰都察院為朝廷耳目國家紀綱
得人則庶政清平羣僚警肅爾毋枉良善縱奸宄各
道御史廉勤公正者留用贓罪者降黜員缺選以充
弘治中命都御史戴珊慎擇各御史其內外官率以
計典為最要然或始相促急寢怠弛凡輕材下位懷
疑內顧習為欺隱而妄加採納使虛誕者獲譽拘謹
者罹毀於是法令滋彰巧飾彌衆而考課亦無以得
其實嘉靖末御史毛愷疏言京官考察止憑各衙門
訪采分近勢親其情易私比外官尤難此由毀譽之
言易惑愛憎之情易投也其人而賢者或因故有不

解之勢乘隙有不白之情而屢負不肖跡其人而不肖或以小伎文其奸厚貌藏其惡又或反覆以搖衆詭譎以持局而得冒賢者名此取舍所以不當也時之積弊大率如此宣德正統間科道九年有保舉陞知府監司無陞同知有特薦陞僉都侍郎等官部屬官有特薦者亦然凡外官考察府察所屬上下其考州縣以月計上府歲計上省三歲計上吏部當洪武初凡選州縣官以到任須知畀夫首祀神以次恤孤獄囚田土制書吏典倉庫會計公廨等三十二條俾銓授者關讀遵守至官報如式否以違制論已下恤民勅頒職掌于有司三歲入覲諸司冊上之定留用官為三等治行卓異者為上召見賜坐宴稱職為中宴不坐不稱職為下不與宴屏立以示甄別制勅布政司理所屬官察勤惰辦廉污綱舉須知事目按察司察督之有縱官吏為暴者巡按御史立糾劾永樂時諭吏部曰守令出一時銓注豈必盡才其令巡按御史及按察司精考郡縣吏半歲以上貪廉能否之實其時出按者至郡邑即具報帝謂尚書蹇義曰御史不博詢何由公宜嚴戒勅毋枉毋縱仁宗即位又諭義曰御史非老成識治體者不任已命監察御史

行天下察吏治諭曰牧守多貪忍為尅害然有專為脂膏而殃民有不善逢迎而得民有虐刑巧取而集事有廉潔自守而政務不舉必究實聞自此外官以次相廉察藩臬二司總郡縣高下而巡按又總之甚至巡撫不敢專行布政而下日伺意旨為趨承有崖異者胥怒而擠之陰注下考壓抑矣故二司以下惟巡撫之是聽職掌皆棄而不治至于州縣政令一稟于監司雖瑣事輒斷以胷臆科條其節目下之使必行數歲間藩臬諸大吏三四易而州縣承其猥率以僥倖塞責其能遵奉者亦上文移以浮詞附和已耳高吏部束言舊制有司三年考滿得平常不稱名令復任其緣事降職除名者許伸理其後人廣而途塞多立名色以汰之用以疏通選調而察黜頻煩初無裨益况巨奸老黠倚伏深巖又考察所不及乎宜令撫按歲會藩臬官面覆其人自辨實其說不果用而時之吏治亦逾衰嘉靖初夏言疏謂弘治前內外臣工相濯磨國家政務鮮不修舉正德以還貨賂公行而刑賞出于私天下遂蕩然不知名節行檢之可貴說誠然後之論者又以為選法實壞于納例夫以貢監正途而例得之則補授靡濫法亦以沮廢是以納例

起考法亦從之弘治間以被災納米令免考尚書王
恕曰考課之法以嚴吏治也各官廩祿有限而襍職
之祿尤微非取于公必剝于下是使考課法格不行
而貪隳之風日滋也斯言也諒矣哉神宗蒞政慎保
舉肅計典除閏考法孜孜于吏治已漸弛希御朝章
奏不一省萬曆二十年後推陞大臣至二十餘上不
報選司久缺吏事停閣行取考選累歲耽延舊擬科
道八十餘人時僅數人凡封駁抄發直廬巡視皆苦
不給按差輒二三年一代三十七年吏部尚書孫丕
揚以累奏沈閣疏求解職大學士葉向高奏言承平
無事人主嘗視士大夫輕而視官重及至有事士大
夫亦視身家重而視官輕禍不忍言矣有旨慰留而
遷補之淹滯如故時六卿奏事皆留中法紀日紊亂
而門戶之禍起于京察舊例京察于正月舉行二月
畢事時累遷至四月不得下于是被論者百計揣摩
以為羅織有人致加玷缺其黨與為之撫拾剖辯主
者又謂之撓亂要挾彼此紛爭而朝廷概無禁止聽
其相角于是言官氣焰橫厲迸作二三柄臣惡其煩
囂朝奏夕去不俟詔命而臺省益操予奪之權用以
徇私交塞賢路其禍遂自此不復止時有齊楚浙三

黨迭與東林構難支分派引睦畛日多辛亥丁巳兩
京察擾攘多故從此黜陟大典胥借為報復之局黨
類排連戈矛互發而銓政一途不可問矣當洪武初
翁張羣材用法刻峻人心惴惴殫職守嗣此百有餘
年風厲名節嘉靖當正德之後俗稍漸靡士大夫猶
各嚴重持大體至萬曆時上操不信之心以待其下
下挾不忠之說以欺其上是非繆亂政事隳裂蓋明
之人材一壞于毅宗之蕩佚再壞于神宗之廢弛迨
門戶起其害相糾結者三十餘年至于國家喪亡而
後止皆萬曆間所釀成也天啟初趙南星為冢宰鄒
維璉夏嘉遇等佐之凡各直省司官缺欲其直省公
會舉以極一時選先此孫丕揚行掣籤法有造籤計
缺等弊請罷之以復舊制其延按所屬請嚴核不得
舉劾失真貪酷漏網時尚一一稍振刷亡何權歸大
璫盡天下名賢廢斥之顧以銓政起大獄而人材之
彫喪極矣懷宗即位如意廓清與海內更始元年諭
吏部今後藩臬郡縣等官照祖宗朝選期陞轉不許
改調兼命巡撫務選用周知民隱者畀以保釐加銜久
任不得內外頻遷二年令內外增設官員悉出駢贅
俾官省事清各修厥職三年詔以添註閏陞一槩停

止科道及吏部司官有才品兼優者陞監司次陞知府若才品勞勩兼茂及司道卓異特著者做正陞例與京堂五年六年屢諭吏部館員應先歷推知其科道不必盡由考選七年用倪元璐議吏部先以治行考科道即送內閣選館員甲乙以文授官仍部議崇禎初吏事整頓如此已以兵餉重催科凡考選必先核錢糧又用戶部言以額徵責成撫按命御史回道嚴核撫臣歲終奏奪劉宗周書有司以掊克為循良而撫字之政絕上官以催徵為考課而黜陟之法亡皆利啟之也功利之見重而廟堂之上不勝其煩頃者嚴賦吏之獄而貪風不盡息導之者未善也帝迂其言不能用時帝汲汲求賢冀得一二以安內攘外而其下黨同伐異僅以名位相軋不復國家為意執國柄者曲意迎合幸免督過一切政事惟上所向無駁議執奏之事部曹皆因仍故習互為隱覆而大小職業率已頽廢帝乃欲大破成格以圖振起有武舉人陳啟新者乘間上言天下三大病首以科目取士資格用人為非遂立授吏科給事中而言路亦有言邊疆衝道皆用乙榜不及進士為銓法之終偏者于是行保舉之法亡論貢監吏士皆得授守牧官十

三年又以吏部考選不列舉貢特命貢士并歲貢二百六十餘人俱于部司及推知察補而先後奏對多以稱旨立峻擢其操縱機權加恩不測似與太祖太宗等而中外之績業無聞蓋常材而蒙異數未為得當也帝鑒熹宗失務綜覈于人材未嘗少縱舍然當天啟之後元氣銷鑠而復加以嚴密吹毛索瘢欲以得非常之人致非常之用天下之遁而去者多矣倪元璐曰今之人情率有四遁而縮胸多畏曰揣摩善規曰畫畔自了曰悠忽自廢循此四者誤國有餘其何以收非常之効乎蓋神宗熹宗時宜少嚴也而失之弛縱懷宗時宜少寬也而失之煩苛寬嚴相反各非其時明之亂亡以此而門庭水火則尤其敗壞之由焉耳始明設庶司纖悉具備成化後納例寢浮益以資格相限制凡監生祇授閒散官不得與民社其儒士差與監生比譯字書篆等略與儒士同辦事後復優敘止序班即纂修不破格而音樂陰陽醫學僧道等皆有專司不與選襍流惟吏員為最夥先者設司吏後設掾史令史等已設提控都吏典吏胥吏獄典攢典酌繁簡為定額永樂二十二年嚴核減正統後數加裁汰在京各衙門吏典猶三千二百六十餘

人由外咨內者分急撥大撥以充缺仍以揀撥互行之缺繁存揀撥缺簡入大撥不許假効勞免覆考凡考外以二內以一為考滿其出身在一品衙門者與從七品而遞降之至從九品止凡轉補亦按衙門遞進之自京衛經歷至吏目止降則以鹽場驛遞閘壩稅課河泊等官及邊遠襍職兼補授承差于三司送部辦事二年選襍流知印以宗人府五府考中者除從八品餘少殺通事亦如之皆不及吏典若六部諸司都吏各一令吏典吏多寡不等勾稽注籍皆出其手叢弊殊甚崇禎初御史有言胥吏一途冒濫多而

為數既煩鑽營巧而出選更易其所踞強半皆貢監之席也今冗員既除選途較窄此輩之神通依然如故而壅塞之苦貢監受之長則題敘與出選之時可不嚴為沉汰乎令非實歷正額者不與官而各吏皆津津戀部缺不以選為事先是例初起納者衆令上糧者先上選已創隨到隨考法又有挖年取捷為挖選枝官散吏蹊徑百出而納例襍其中銓法之所以日亂也國初籍天下富戶至京師太祖意以殷實者少貪墨校材而用之迄乎標季取其資不復量其能故濫觴一至此懷宗五年嚴禁止已海內多事人盡

絕意罕求進其納例亦不復舉云

明史卷七十八

志五十二

選舉八
銓選下

太祖以武功定天下置五府官及司衛所各軍職以
控制中外兵部尚書籍而掌之屬以四司曰武選職
方車駕武庫而武選特掌除授陞調襲替功賞之事
凡武職有世官有流官世官九等曰指揮使及同知
僉事衛所鎮撫正副千戶百戶試百戶皆有襲替職
流官八等曰都督及同知僉事都指揮使及同知僉
事正副留守類以世官陞授或兼武舉用之洪武二
十六年定例凡陞授調補復職皆由部覈實請旨永

樂初令有功陞都督都指揮及見陞者與流官其千
百戶等與世襲國初武職率以勳舊其後參用將材
三歲武舉六歲會舉歲薦舉隸之兵部以次除授凡
大選宣德三年奏定條式一色目二狀貌三才行四
封贈五襲廕仍具保勘憑考核始設官有定制其後
陞授滋廣分現任帶俸不拘額而未實授者有署職
試職納職之別凡署職加本職一級准半之不支俸
試職作一級俸半之非軍功不實予都指揮以下擬
陞五府以下署職者有勞績並從原職加陞雖恩典不
實授各都司僉書及內地參遊等悉如之在外衛所
官以指揮陞都指揮者仍改註以千戶功陞者不列
銜納級者雖有功俱于原銜所帶俸諸不由銓授保
薦朦溷奏請及乞恩傳奉祖襲選法者傳以罪始太
祖慮世職有不率以武士訓戒錄大誥武臣錄頒之
太宗時屢勅諭軍政號嚴肅已法紀隳壞選用紛襍
成化中添設旗軍校尉勇士等正德間冒功陞授三
千有奇嘉靖中霍詹事韜疏言太祖之設軍職也成
化中增四倍今又幾倍矣以錦衣一衛言之初額官
二百有五員今千七百員增八倍矣洪武初軍功襲
職令軍功子弟年二十者比試初試不中聽襲職署

事食半俸二年再試中者食全俸仍不中降充軍法
至嚴故材勇者擢庸劣者黜職不冗而俸易給自永
樂來新官免比試舊官即比試賄賂無不中此軍職
所以日濫也永樂中克平交趾祇賞賚無陞職適年
奏捷獲馘者陞矣奏帶者緝妖言捕盜者陞矣巧冒
陞遷此軍職所以益冗也宜命大臣循清黃例盡內
外武職差次功等考其祖宗相承或叔姪弟兄總及
或洪武永樂年間宣德以後功或內臣弟姪恩蔭或
勲戚駙馬子孫或武舉取中各分數等嘿寓汰省之
法許世襲許終身或許總不許總各具籍冊昭示以
激勸于是命給事中夏言等查覈冒濫言等疏言弊
有三奏帶之數太多紀驗之次失實而武功之法盡
壞也鎮守官奏帶例止五名今至三四百名故一人
而奏帶數處者有之一時而數處獲功者有之他復
巧立名色紀驗不加審覈銓選又無駁勘其改重陞
併功加授之類弊端百出宜盡革以昭神斷部核如
議而宿蠹乃清蓋勲闕世胄荒于職掌而府衛為虛
設駙儉之姦得相蔓引以窳其中漸使然也凡會推
五軍都督府掌印缺于見任公侯伯推二人僉事缺
于帶俸公侯伯及在京都指揮在外正副總兵推二

人錦衣堂上官及前衛掌印缺照五府例推二人都
指揮留守以下上二人正德十六年令五府及錦衣
衛必由都指揮累著勲庸許陞授諸衛官不以世獨
錦衣以世兼令掌詔獄嘉靖中令部試擢二人始奏
用鎮撫司員缺于衛鎮撫銓補五府官于本衛推用
各都司掌印僉書官聽鎮巡以下保舉而奏請除授
悉兵部掌之各直省設都指揮使司二十一留守司
二衛九十二守禦屯田郡牧千戶所二百十有一以
至苗蠻設土司不等所屬上之府移部聽選仍移府
下之都司衛所而首領官亦有隸之吏部者永樂初
增立三大營設管操官各哨有分管坐營官坐司官
景泰中設團營十已設有十二復設三各有坐營官
命親信大臣提督之嘉靖中令提督不與推坐營許
推用顧自成弘來勲爵用事廣恩倖冗員既多納級
者復猥瑣滋甚裁汰以數千計萬曆十五年詔令嚴
加察核又諭非世職武舉不許領勅管事及推舉咨
用弊少減而每年六選選祇五六人武舉仍壅塞不
得進萬曆二十三年議將武舉在京衛者送京營在
邊腹者咨督撫酌量委任三十九年令三科武舉先
給劄付齎投督撫三薦始陞用四十四年兵部又議

正薦者次錄之其提薦揭薦以二准一分數則世職
七之科三之舊科于世職內量用一人三科有薦者
于武科內間一酌用至于出身行伍祇論戰功凡戰
功竒功為上首功次之首功四等先迤北次遼東次
西番苗蠻次內地而遷補復不易大約明季武途有
四曰實職曰武舉曰行伍曰納級時選政稠濁蠹弊
日增神廟中令提鎮科道會同兵部品年資課技藝
序薦剡分為三等名曰公選然司其事者皆篩取虛
名未求實効此選法之所以逾壞而釀禍于後也凡
軍政成化二年令五年一行以見任掌印帶俸差搽
及初襲職官一體考選十三年令兩京通考以為常
五府大臣及錦衣衛堂上官自陳請旨已命各直省
總兵官亦如之在內五府所屬並上直衛所官悉從
巡視官及部官注送在外都司衛所官憑撫按造冊
繳部副叅以上千戶以下屬都布按三司察註由撫
咨部叅詳類奏其與選者孝陵衛官自弘治十二年
始錦衣衛官自正德十年始騰驤四衛官自嘉靖八
年始洪永間管軍百戶自嘉靖九年始內外衛所裒
庸者即令承替自隆慶六年始內外員皆有定額無
增減臨期不許輒更調錦衣衛管戎務者倍加嚴考

南北稍次之各衛所及各地地方守禦並各都司隸之
巡撫者選例同惟管漕運不與考若屯田于考選時
擇其廉幹者萬曆元年通行各撫按衙門以掌印管
屯為主有幹濟先註用其膂力堪抗禦委各路管軍
餘充差各衙門俟保薦推用凡役占軍士缺班額欠
屯糧失盜領運干犯皆依例降級有差營求囑託者
立黜之永帶俸萬曆二十四年兵部題請京營將領
三年一揀選坐營以下通得考察八月又令武臣以
任責成崇禎時屢飭兵部將勲衛等官廣咨嚴核以
昭勸懲然亦隨牒注擬行五年故事而已武官爵止
六品其世職歿者襲老疾者替歷世以多故絕以旁
支繼族屬踈遠者名犯堂例不許限以年六十子替
職洪武間定以嫡子襲替長幼次及之絕者嫡孫庶
子孫次及之又絕者以弟繼永樂後取其官舍旗軍
餘丁曾歷戰功者令原帶俸及管事襲者悉因之其
降級子孫仍替見降職事弘治時令旁支減級承襲
正德中令旁支入總旗時冒濫日衆嘉靖間始革其
傳陞乞陞者令照小旗例收充并鎗有功乃陞授其
旁支無功者不得保送凡陞職官舍照父級其陣亡
保襲者許流官一等並查皇親官員子孫黃選有欽

依者襲一輩內外衛所試職署職官獲功止實授冒
陞及越陞皆減革其納級不准襲侍衛將軍襲替亦
違降應役者克校尉不及者與力士止一輩凡襲替
官舍以騎射試之洪武三十一年以後為新官子孫
出幼者免比試以前為舊官俱比試其以旗役錄用
者仍併鎗陞降之凡世職難稽覈故例特詳而長弊
叢奸卒無能得其用始太祖慮後世武臣有不軌為
之損事權使大小聯屬相控制軍旅不得擅調發或
以文臣專治之曰總督曰提督或與總兵兼治之曰
贊理次曰監軍曰贊畫並以部員佐其事邊塞重地
總兵稱將軍予以印否則大征討始授之已仍綴諸
衛所不得私自下符檄指揮以下巡撫得咨部進退
之數十年間海內晏安不用兵革舉大小軍職皆俯
首帖息聽命于文吏顧其時巡撫皆握重兵掌戎務
兵上下得指使往往能奮其力以討叛逆平寇盜神
廟以降撤武備者五十餘年崇禎當廢弛之後流氓
蹶起欲振興武職有鎮七撫三之議于是巡撫勢日
衰而地方仍舊有其責有失陷率加以重罪而總兵
不之問玩師失衆至流寇蔓延而不解所由來也當
成弘之際凡京營邊鎮類以中官監視相為掣肘懷

宗時數撤數遣既以猜疑待天下而欲憑武選以啟功名之途收將士之用豈有少益哉崇禎十六年諭兵部謀勇之將加意遴選有功績者不時列奏且令卓異諸臣選入樞曹者一同詞臣臺省陞遷比他選獨優其于武途揚厲過當冀或得人材成大功而時已不可為矣當其始防馭太嚴使武臣皆受制于文臣故二百餘年將士皆兢兢奉法一無擁衆恃強圖為不逞之事然皆不能展其志雖有大帥立功邊鄙並以金錢結納朝士要非有戰勝攻取之殊績其後假借太濫武臣驕恣不用命文臣又力無以制之而僅相推諉飾功掩過幸免于督責此明之所以敗而抵于亡法雖具而謂之無亦可也其文臣任子畧與武職襲替等由嫡子及其孫與弟皆以序而恩降五等一品正廕子五品正從次之遞降至七品凡三品以上考滿得敘者為官生出特恩不限品者為恩生有補廕有改廕初授率中書舍人等考既滿陞銜仍辦事其授部員歷俸六年者遞進萬曆初命官恩生出身者果歷任賢能藩臬京堂許推用然束于常規未能躡進往往添註加銜至太常卿而止至宗職始列宗學為宗生已許奉國中尉以下與鄉會試萬曆

三十四年李廷機議封爵科目原屬兩途今既從科目應照士子一體銓選于是部議以中式者二甲選知州三甲選推官知縣鄉舉亦例補俱不補京職崇禎八年議以宗秩換授禮部署侍郎陳子壯疏言今謂進士豈必賢于鄉舉則鄉舉豈必賢于貢監貢監豈必賢于齊民夫然天下胥為齊民以待舉已耳何必辛勤計偕乎今宗藩中將軍中尉有祿食之貴誰肯避逸而趨勞而謂將有劉向李勉趙汝愚之才未必然也按洪武定制未嘗以換官職與科目並著惟賜採納允罷前議懷宗怒下之獄仍令部議宗室中有文武才考驗換授九年禮部議以宗才薦舉由保舉長史啟親王核勘以聞下部咨詢分差等策問或召對然後因才以授官在外府佐州縣正及教職在內部曹及中行評博陞轉如常例聽撫按舉劾顧其後績業罕著官爵鮮通顯宗職亦遂以停罷大約明自洪永來文以制科武以世勲文武率二途已耳因沿日以蠹壞叢集重以末季寇患交訐一無可恃于是大破資格異途雜流皆力推引上而宗室下而編氓無不採錄冀得一二才俊以資其用而顧嘗試無一効術逾窮而材逾絀勢遂阨危不可救夫自古世

之治亂勢而已矣勢在下雖天下有所恃而其衰也
輒有強藩叛帥之患勢在上海內拱手奉一尊而其
亂也遂文弛武玩相退縮以迄于亡蓋祖宗之任人
綱張目舉未始不極其用而後漸以凌替也崔銑嘗
論之曰國家有漢之全盛無其強無宋之苟安類其
弱皆由士業草率登仕太易鮮治經世之學官多牽
制遷代太數不予專斷之權斯其盛衰之故也哉故
畧次其本末俾後有考焉

